

侶  
山  
堂  
類  
辯

侶山堂類辯序

余家胥山之陰。幾岬之麓。有石壘焉。紛出。余因其屹然立者。植之爲峰。塊然枵者。依之爲岡。峭然削洞然谷者。綴之爲曲屈。爲深窈。就其上築數椽。而南則構軒臨其山。客有訪余者。望其蓊蔭秀。咸低徊留之。擬冷泉風况焉。余日坐臥軒中。幾三十年。凡所著述。悉于此中得之。去冬素問成。漸次問世。偶慨嘆曰。旣闡聖緒。仍任習訛。譬比倒瀾。等同鷗泛。爰是錯綜盡蘊。參伍考詳。隨類而辯起焉。雖然。惡乎辯哉。夫天下有理所同者。同無容辯。天下有理所異者。異亦無容

辯卽天下有理之同而勿爲理之所異。理之異而或爲理之所同者。同中異。異中同。又無容辯。惟是理之同矣。而同者竟若異。理之異矣。而異者竟勿同。同之不可爲異。異之不可爲同。又何容無辯。辯之而使後世知其同。卽知其所以異矣。知其異。卽知其所以同矣。知其同不爲異。異不爲同。卽知其所以同。所以異矣。無事辯矣。若曰子好。豈敢云然。

康熙歲次庚戌正陽月西泠隱菴張志聰書于崑池之花闌

侶山堂類辨目錄

卷上

辯血

辯氣

辯兩腎

辯三焦

辯包絡

辯督脉

辯藏府陰陽

辯九竅

辯七門

春傷于風夏生飧泄秋傷于濕冬生欬嗽  
冬傷于寒春必病溫夏傷于暑秋必痲痺  
亢則害承廼制制則生化

上部有脉下部無脉其人當吐不吐者死

東方實西方虛瀉南方補北方

鍼經論

傷寒書論

金匱要畧論

診法論

識脉論

音聲言語論

望色論

問因論

傷寒傳經辯

陰證陽證辯

陽劇似陰陰劇似陽辯

陰證本于陽虛辯

邪正虛實辯

陽脫陰脫辯

病有新故辯

飲酒傷脾辯

發汗利水辯

癰勞鼓膈爲難治之因辯

能醫傷寒卽能醫痘疹能醫痘疹卽能醫癰毒

辯

乳癰鼠瘻辯

能食而肌肉消瘦辯

奇恒論

利論

中風論

頭痛論

心痛論

腹痛論

消渴論

欬嗽論

砂證論

痘論

附五類救逆丹  
百祥丸  
玄免丸

瘡論

附方

胎前論

產後論

急下論

急溫論

汗下論

往來寒熱論

潮熱論

傷寒論編次辨

風傷衛寒傷榮辨

醫學入門

醫以力學爲先

中庸之道

雜證論

十干化五行論

卷下

本草綱領論

藥性形名論

草木不凋論

四時逆從論

大棗

梔子

枇杷

款冬花

澤瀉

芍藥

牡丹皮

括樓

麥牙

薯蕷

枸杞

紅花

石膏

女貞實

蓮實

桑上寄生

紫草茸

枳實



橘皮

麥門冬

防已

附子

丹雄雞

黑豕

鱗類

蚌蛤

血餘

龜板鹿茸

半夏天花粉

百合紫蘇

羌活防風

雞子金銀花王不留行

沙參人參黃芪

薑附辯

炮製辯

畏惡反辯

奇偶分兩辯

寒熱補瀉兼用辯

官料藥辯

金匱腎氣丸論

枳朮湯論

膠艾湯論

戊癸合化論

太陰陽明論

虬蟲

侶山堂類辯卷上

西陵隱菴道人撰

同學弟開之合叅

辯血

經云營氣之道。內穀爲寶。穀入于胃。乃傳之肺。流溢于中。布散于外。精專者行于經隧。是血乃中焦之汁。流溢于中。以爲精。奉心化赤而爲血。衝脉與少陰之大絡起于腎上。循背裏。爲經絡之海。其浮而外者。循腹右上行。至胸中而散。充膚熱肉。滲皮膚。生毫毛。男子。上唇口而生髭鬚。女子。月事以時下。此流溢于中。

之血半隨衝任而行于經絡半散于脉外而充于膚  
腠皮毛臥則歸于肝藏是以熱入血室刺肝之期門  
臥出而風吹之則爲血痺此散于皮膚肌腠故曰布  
散于外乃肝藏所主之血也故婦人之生有餘于氣  
不足于血以其月事數脫于血也時俗皆謂男子血不足女子血有餘  
此血或因表邪太盛迫其妄行以致吐衄者有因肝  
火盛者有因暴怒肝氣逆而吐者吐則必多雖多不  
死蓋有餘之散血也又心下包絡之血亦多此從衝  
任通于心包爲經絡之血者乃少陰所主之血也如  
留積于心下胸中必脹所吐亦多而或有成塊者此

因焦勞所致。治法宜引血歸經。若屢吐不止。或咳嗽  
而成勞怯。或傷腎藏之原。而後成虛脫。所謂下厥上  
竭。爲難治也。其精專者。行于經隧。心主之血也。中焦  
蒸水穀之津液。化而爲血。獨行于經隧。以奉生身。莫  
貴于此。榮行脈中。如機緘之環轉。一絲不續。乃回則  
不轉。而穹壤判矣。是以有吐數口而卒死者。非有傷  
于血。乃神氣之不續也。有因咳嗽而夾痰帶血者。肺  
藏之血也。有因腹滿而便血唾血者。此因脾傷而不  
能統攝其血也。學者先當審其血氣生始出入之源  
流。分別表裏受病之因。證或補或清。以各經所主之

藥治之。未有不中于竅郤者矣。近時以吐血多者。謂從胃出。以陽明爲多血多氣耳。不知陽明之所謂多血多氣者。以血氣之生于陽明也。而太陽太陰厥陰亦主多血。非獨陽明。試觀剖諸獸腹。中心下夾脊包絡中多血。肝內多血。心中有血。脾中有血。肺中有血。腎中有血。胃實未嘗有血。而可謂多乎。

辨氣

或曰。人秉陰陽水火而生。總屬一氣血耳。余觀傷寒論註疏。子以皮膚肌腠五藏六府各有所主之氣。恐于陰陽之理相背歟。曰。子不明陰陽離合之道。合則

爲一離則有三。太陽之氣生于膀胱而主于膚表。少陽之氣生于腎藏而通于肌腠。故靈樞經曰：三焦膀胱者，腠理毫毛其應。蓋太陽之氣主皮毛，三焦之氣充肌腠。此太少之氣由下焦之所生。若夫陽明之氣，乃水穀之悍氣，別走陽明，卽行陽行陰之衛氣。由中焦之所生，此三陽之氣各有別也。三陰者，五藏之氣也。肺氣主皮毛，脾氣主肌肉，心氣通血脈，肝氣主筋，腎氣主骨。此五藏之氣各有所主也。夫氣生于精，陽生于陰，胃府主化生水穀之精，是以榮衛二氣生于陽明。膀胱者，州都之官，精液藏焉，而太陽之氣生于

膀胱。腎爲水藏。受五藏之精而藏之。故少陽之氣。發于腎藏。水穀入胃。津液各走其道。五藏主藏精者也。是三陰之氣。生于五藏之精。故欲養神氣者。先當守其精焉。夫一陰一陽者。先天之道也。分而爲三陰三陽者。後天之道也。子不明陰陽之離合。血氣之生始。是謂失道。客曰。三陰三陽。敬聞命矣。請言其合也。曰。所謂合者。乃先天之一炁。上通于肺。合宗氣而司呼吸者也。夫有生之後。皆屬後天。故藉中焦水穀之精。以養先天之精炁。復藉先天之元炁。以化水穀之精。微。中下二焦。互相資益。故論先後天之精氣者。養生。



之道也。分三陰三陽者。治病之法也。如邪在皮膚。則傷太陽之氣。或有傷于肺。邪在肌腠。則傷少陽陽明。或有傷于脾。邪中少陰。則有急下急溫之標本。邪中厥陰。則有或寒或熱之陰陽。此在天之六氣傷人之三陰三陽。猶恐其不能分理。而可以一氣論乎。若謂正氣虛者。補中下二焦之元氣。以禦六淫之邪。則可。

### 辯兩腎

門人朱濟公問曰。有云兩腎皆屬水。命門居兩腎之中。在脊之十四椎內。爲三焦生氣之原。有如坎中之滿。此說甚爲有理。曰。此不經之語耳。夫醫道始于黃

岐藏府血氣之生始出入。非生知之聖。孰能究其精微。奈何後學不體認聖經。反好爲異說。夫人之始結胚胎。猶太極耳。三月而成形。先生兩腎。猶太極而生兩儀。天一之水生木。木生火。地二之火生土。土生金。是先天止有水火。後天始備五行。五行之中有二火。合而爲三陰三陽。以配六藏六府。故靈樞本輸篇曰。少陽屬腎。腎上連肺。故將兩藏。蓋少陽乃三焦之生氣。發于右腎。上合包絡。爲相火之原。左腎屬水。上連于肺。故爲兩藏也。腎上連肺詳水熱穴論又本藏篇曰。腎合三焦膀胱。蓋右腎之氣上合于心主。包絡而爲一藏。又

素問欬論曰。腎欬不已。則膀胱受之。久欬不已。則三焦受之。是內經止曰腎。而原無命門之名。蓋以一腎合三焦。一腎合膀胱。是爲兩藏而配合兩府者也。夫人秉陰陽水火而生。若以兩腎象坎中之滿。又將何藏以象離中之虛乎。潛心聖經。自不爲前人所惑。濟公復問曰。難經謂右腎主男子藏精。女子繫胞。師言爲相火生氣之原。是左腎主水。右腎主火。精水止生于左。而胞當偏于右矣。曰。非此之謂也。夫天地陰陽之道。在無形之氣。曰陰曰陽。有形之徵。曰水曰火。在人之元神。曰氣曰精。天一生水。地二生火。陰中有

陽陽中有陰。兩腎之氣。交相貫通。左右之皆有精有氣。水卽是精。火卽是氣。陰陽水火。互相資生。否則孤陽不生。獨陰不長矣。夫藏精繫胞之說。亦不過分別男女而言。然在女子。未嘗不藏精。在男子。亦可以結胎者也。胞之所繫。蓋言天至生物。地至成物。故繫于右。乃氣之所感。非胞之連絡于右腎也。如云日月星辰繫焉。亦大氣之所載。日月運行星移斗轉。又何嘗有所繫帶乎。

、辨三焦

己酉之秋。內經甫竣。興懷山水。八月旣望。偕二三知

已夜泛西冷時月明雲斂天高氣清呼盧暢飲幾忘  
寤寐偶論及三焦有云無形之氣者有云有形之經  
者聚訟不已質之于余余曰有形無形皆是也但各  
偏執一見而不能通貫耳靈樞經曰三焦膀胱者腠  
理毫毛其應金匱要略云腠者是三焦通會元真之  
處理者皮膚藏府之文理也蓋三焦乃少陽相火卽  
精水中所生之元陽壯則爲火和平爲元氣游行于上中下之  
間通會于腠理之內實無形之氣也若游行之氣不  
應屬一府而有經穴矣經脉篇曰三焦之脉入缺盆  
布膻中散絡心包下膈循屬三焦下膈乃胃分循榮者循于三部也

衛生會篇曰。上焦出于胃上口。中焦亦並胃中。下焦者別廻腸。平脉篇曰。三焦不歸其部。上焦不歸者噫而酢吞。中焦不歸者不能消穀引食。下焦不歸者則遺洩。是三焦之氣發原于腎藏。歸着于中。胃上下之間。靈樞經所論之山處。卽平脉論所歸之部署也。有有形之部署。則有經脉氣穴而爲一府矣。藏府血氣之生始出入。先聖賢多詳論于諸經之中。奈何後人不能博覽群經。又不能貫通會悟。是以各執一見而爲一偏之辭。嗟嗟三焦之理。數千年以來。尚議論紛紜。無惑乎諸君之折辯也。

辯包絡

越人謂心主包絡。與三焦爲表裏。俱有名而無形。後人有以命門爲包絡者。皆非通論也。少陽三焦之氣。生于腎藏。卽相火也。相火者。先天所生之元陽也。包絡者。包絡于心下。多血而主脉。爲君主之相。其脉起于胸中。出屬心包絡。下膈。歷絡三焦。在三焦曰歷。皆分循。分歷于中。胃上下之間。是包絡在膈上。三焦在膈下。皆屬有形之藏府也。但包絡三焦之氣。並出于腎。一游行于上中下。而各有所歸之部署。一入于心下包絡。而爲君主之相。靈樞經云。腎合三焦膀胱。乃腎氣上合于心包。猶膀胱之歸于部署。猶腎與膀

膀胱太陽與君火標本之相合也。腎中之元陽先天之水火也。君火與包絡。後天之二火也。包絡三焦皆以有形無形之間求之。則得矣。

、辨督脉

骨空論曰。督脉者起于小腹以下。骨中央。女子入繫庭孔。其孔溺孔之端也。庭孔陰戶也。溺孔之端戶內之產門也。此言督脉起于小腹之內。故舉女子之產戶以明之。是男子之督脉亦起于小腹內。宗筋之盡處。故下文曰。其男子循莖下至纂。與女子等。蓋此節舉女子則男子可知。下節舉男子則與女子等也。其



絡循陰器。合纂間繞纂後。別繞臀。至少陰與巨陽中  
絡者。合少陰上股內後廉。貫脊屬腎。纂初患切。腎音  
屯。纂間前後二陰相交之處。此言督脉循陰器之  
下。從後臀貫脊。在十四椎之間。從命門而入內屬腎。  
蓋命門乃督脉所入之門。故越人以右腎名爲命門。  
謂督脉主陽而右腎屬火也。與太陽起于目內眥。上  
額交巔。上入絡腦。還出別下項。循肩髃內。夾脊抵腰  
中。下循膂絡腎。根結篇曰。太陽根起于至陰。結于命  
門。命門者目也。督脉之從上而下者。起于太陽之命  
門。上額交巔。絡腦出項。循肩抵腰。下膂絡腎。是起于

陽者出于上之命門而入于下之命門也。蓋太陽與督脉乃陰中之生陽。本于先天之水火爲性命始生之門。故上下出入之處皆名命門。上節曰貫脊屬腎。此節曰循脊絡腎。猶藏脉之屬藏。絡府脉之屬府。絡藏督脉之從下而上。從上而下皆從命門而入。屬絡于兩腎者也。出于庭孔者起于陰而貫脊屬于左腎。與太陽起于目內眥者起于陽而下脊絡于左腎。是以陰屬陽以陽絡陰。陰陽交互之妙用也。夫男左女右。故上節論女子。此下論男子。良有以夫。其男子循莖下至鑣與女子等。其少腹直上者貫齊中央上

貫心入喉上頤環唇上繫兩目之下中央齊同膈○

此言督脉之原起于小腹之內而分兩岐一從後而

貫脊屬腎一從前而循腹貫齊直上繫兩目之下而

交于太陽之命門是督脉環遶前後上下一周猶天

道之包乎地外也世人咸謂背爲陽腹爲陰督脉循

于背總督一身之陽任脉循于腹統任一身之陰又

不明越人以右腎爲命門之義故已詳註于素問而

復申明之

○督脉分兩岐而內絡兩腎越人尚不能  
詳析經義○出分兩岐而入亦分兩岐

### 辨藏府陰陽

經云太陰之上濕氣治之而有肺金之燥燥濕之相

濟也。是以脾喜燥而肺喜潤。陽明之上燥氣治之。而胃合太陰之濕。藏府雌雄之相配也。是以陽明不從標本。從中見太陰之濕化。陰陽和平。燥濕相合。則飲食消化。津液運行。而肌肉豐厚。如陰陽不和。則能食而瘦矣。故脾胃之陰濕太過者。宜燥之。溫之。陽明之燥熱已甚者。宜苦寒以洩之。肺與大腸病。秋金之燥者。宜清涼以潤之。感太陰之濕者。宜溫熱以燥之。此平治陰陽燥濕之道也。少陰之上。君火主之。而有腎藏之水。太陽之上。寒水主之。而有巨陽之陽。陰陽標本之相合也。是以水上火下。斯成既濟之無咎。若水

不上濟則火盛而心懸如病飢。火不下交則下焦寒而足膝厥冷。故當調攝其水火之升降焉。厥陰之上風氣治之。而有包絡之火。少陽之上火氣治之。而有甲木之風。蓋火生于木。風自火出。風火之相生也。故火熾者當先平其風。木風烈者宜先息其火。炎此陰陽五行雌雄配合各有平調之法焉。故善養生者非惟苛疾不生。更可以延年不老。

### 辯九竅

經云。天氣下降。氣流于地。地氣上升。氣騰于天。天地交而生化萬物。人秉天地陰陽之氣而生。是以人之

形身應天地之日月五星山川谿谷而人之九竅亦

應地天之泰卦也。上三竅皆偶。下三竅皆奇。肺心肝為陰中

之陽而開竅皆偶。脾腎為陰中之至陰。而開竅皆奇。此天地爐錘之妙用也。奇偶之間名

曰人中。蓋以此中分人之上下陰陽也。肺開竅于鼻。

心開竅于耳。肝開竅于目。脾開竅于口。腎開竅于二

陰。王師曰：腎將兩藏。故開竅于二陰。是五藏五陰之氣通于九竅者

也。六府不和則九竅為之不利。是六府六陽之氣通

于九竅者也。九竅為水注之氣。是藏府之津液外注

于九竅者也。陰中有陽。陽中有陰。陰陽交互。上下和

平。水隨氣而運行于外。是天地交而九竅通也。若陰

陽不和則九竅閉塞水道不行則形氣消索矣。

辯七門

越人十四難曰唇爲飛門齒爲戶門會厭爲吸門胃爲賁門太倉下口爲幽門大小腸會爲關門下極爲魄門是謂七衝門人但知飲食從飛門而入糟粕從魄門而出不知所謂門者有開有闔有旋轉之樞神氣之有出有入皆由此門如曰吸門必先呼出而後能吸入有如轆轤之有升有降也夫人之所以養生者莫先乎飲食如飲食不下二便閉癰多有因于氣機不轉入但知降下而不知升提有如轆轤之繩

西不能下。因東之碍而不升。故曰。將欲下之。必先舉之。此之謂也。開之曰。有碍于升者。有碍于降者。宜審別治之。又不可必其升而後降也。

春傷于風。夏生飧泄。秋傷于濕。冬生咳嗽。

東方生風。春之氣也。中央生濕。土之氣也。至于夏秋

之交。故曰。秋傷于濕。

玉師曰。土主四氣之七月八月。故秋傷于濕。

夫身半

以上爲陽。身半以下爲陰。腰以上爲天。腰以下爲地。

故陽者。天氣也。主外。陰者。地氣也。主內。故喉主天氣。

嗌主地氣。

嗌乃胃土之門。脾脈貫胃絡嗌。

陽受風氣。陰受濕氣。風乃

陽邪。故傷于風者。上先受之。陽病者。上行極而下。故



春傷于風。夏生飧泄。濕乃陰邪。故傷于濕者。下先受之。陰病者。下行極而上。故秋傷于濕。冬生咳嗽。此天地陰陽之邪。隨人氣之上下升降者也。夏生飧泄。是天氣之下降。

于地也。肺主天。冬生咳嗽。是地氣之上騰于天也。

張開之曰。因上受之邪。而生在下之病。下受之邪。而生在上之病。故曰生。謂從上而生于下。從下而生于上也。

冬傷于寒。春必病溫。夏傷于暑。秋必痄瘡。

溫病瘡病。皆邪伏于內。而後發者。寒乃陰邪。冬時陽氣內盛。故邪伏于在外皮膚之間。冬至一陽始生。至

春陽氣盛長外伏之陰邪與陽相遇邪正相搏寒已

化熱故春發爲溫病也

陰遇陽則化熱陽遇陰不隨正氣所化故與陰氣寒熱交

爭暑乃陽邪夏時陽氣在外裏氣虛寒故邪伏于裏

陰募原之內夏至一陰始生至秋陰氣盛長內伏之

陽邪與陰相遇邪正相持故發爲往來寒熱之瘧瘧

瘧陰瘧也陰邪發陽病陽邪發陰病皆人氣之所化此天地陰陽之邪隨人

氣之外內出入者也夫內經首重天地陰陽之氣寒

暑往來升降出入人居天地氣交之中隨四時之寒

暑往來而四時之風寒暑濕又隨人氣之升降出入

東垣不明經旨反穿鑿綴緝而安道譏之安道譏之

而亦不能闡發其經義是使後人而復譏後人也  
開之曰春時陽氣盛長秋時陰氣盛長伏邪必隨氣  
而外出故曰必

亢則害承廼制制則生化

古文制生則化今  
文改爲制則生化

帝曰願聞地理之應六節氣位何如岐伯曰顯明之

右君火之位也君火之右退行一步相火治之

以臣  
受君

故曰退行一步復行一步土氣治之復行一步金氣治之復

行一步水氣治之復行一步木氣治之復行一步君

火治之相火之下水氣治之水位之下土氣承之土

位之下風氣承之風位之下金氣承之金位之下火

氣承之。君火之下。陰精承之。帝曰。何也。岐伯曰。亢則害。承迺制。制則生化。此論地之六節。以應四時之六氣也。天道左旋。地道右轉。故曰顯明之右。顯明者。寅正之時。曰方顯而明。故曰顯明。乃厥陰風木所主之時也。君火之位。乃二之氣。少陰所主之六十日也。相火之位。乃三之氣。少陽所主之六十日也。土氣之位。乃四之氣。太陰所主之六十日也。金氣之位。乃五之氣。陽明所主之六十日也。水氣之位。乃終之氣。太陽所主之六十日也。復行一步。木氣治之者。周而復始也。

也。

復言水氣以便接前歲之金制水生

步者。六十日爲一步。以至時之

氣紀步也。治主也。承者下承上也。蓋以主時之氣在上而行過之。氣在下也。如四之氣太陰濕土主氣而無承制。則土亢矣。少生氣則不及矣。有木制火生于下。則土化而和平矣。又如初之氣乃厥陰風木主氣。如無承制。則木盛矣。少生氣則不及矣。有金制水生于前。則木化而和平矣。化者卽天地陰陽之造化。若太過不及。則有災眚之變。而不能化生萬物。故曰制生則化。謂有制而有生。則化矣。元人王安道謂改制則生化爲是。蓋亦不明經義者也。此總論五行生剋之道。可一言以蔽者。奈何前人倂規矩而改錯雕鏤。

深刻議論紛更。所謂道在邇而求諸遠。事在易而求諸難。非惟求之不得。且使邇者易者。反可黃可黑矣。

上部有脉下部無脉其人當吐不吐者死

難經十三難曰。上部有脉下部無脉其人當吐不吐者死。上部無脉下部有脉。雖困無能爲害。所以然者。脉之有尺。譬如樹之有根。枝葉雖枯槁。根本將自生。脉有根本。人有元氣。故知不死。此越人論脉之生于中胃。寸生于尺。陽生于陰也。夫藏氣者。不能自至于手太陰。必因于胃氣。乃至手太陰也。尺者。脉之根也。故善調尺者。不待于寸。是以上部有脉下部無脉。

其人當主吐傷中胃而見此脉也。若不因吐而見此脉者，生氣已絕于內，卽所謂寸口脉平而死者是已。故上部無脉，下部有脉，如樹之有根，雖困無害。上下文義一氣呵成。張氏圖註云：凡人之脉，上部有而下部無，乃邪實在上，生氣不得通達，故當吐其邪而升其氣。否則源塞，故知必死。是張氏以上節論邪下節論正一段氣脉，分爲兩截矣。且邪壅于上而下氣不得疏達者，下部之脉必有力而沉緊，未有氣壅于下而反無脉者也。若以無根之脉而再令吐之，是促之速死矣。予嘗診霍亂之脉，寸尺皆無脉復者生，不復

則死。要知始吐之時。先下部無脉。待師至診之。并上部皆無矣。越人註難經八十一篇。乃採摘內經設爲辯難。雖義理明顯。然其中亦有錯誤。若再疏註。差訛又爲越人之罪人矣。噫。著述難而箋釋亦不易易。

東方實西方虛。瀉南方補北方。

七十五難曰。經言東方實。西方虛。瀉南方。補北方。何謂也。然金木水火土當更相平。東方木也。西方金也。木欲實。金當平之。火欲實。水當平之。土欲實。木當平之。金欲實。火當平之。水欲實。土當平之。東方者肝也。則知肝實。西方者肺也。則知肺虛。瀉南方火。補北方



水南方火。火者木之子也。北方水。水者木之母也。水勝火。子能令母實。母能令子虛。故瀉火補水。欲令金不得平木也。經曰。不能治其虛。何問其餘。此之謂也。夫遽曰金欲實。火當平之。水欲實。土當平之。是五行之氣皆有亢有制也。奚止東方實而南方當瀉乎。要知上二句乃啟下之文。下二句乃承上之辭也。意若曰。假如東方實。西方虛者。當瀉南方而補北方也。瀉南方者。瀉東方之實。實則瀉其子也。補北方者。補西方之虛。子能令母實也。肺主呼吸而腎爲生氣之原。故經言腎爲本。肺爲末。荀子曰。未有子富而父貧者。

卽此義也。然首末經義。重在補虛。首末是經義中故

曰。不能治其虛。何問其餘。當知瀉南方。亦所以補西

方也。何問其餘者。言五行之氣。皆可推而論之。設使

西方實。東方虛。又當瀉北方。而補南方矣。雖然。東南

主生長之令。其氣多實。西北主收藏之氣。其氣多虛。

故曰。歲半以上。勝之常也。夫金欲實。火當平之。水欲

實。土當平之。分論主時之氣。而各有太過也。東實西

虛。瀉南補北。統論一歲之氣。而有虛實也。以歲氣而兼論人身

之五行皆可參論經義。可分可合。庶爲得之。

鍼經論

靈樞古名鍼經。隋書經志籍謂之九靈。唐王冰改爲靈樞。蓋亦有所本也。其中論藏府陰陽雌雄配合。精神氣血生死原流。營衛之經行出入。經脉之終始循環。三陰三陽有血氣之多少。手經足經分寸之短長。五藏五行之氣。外合皮肉筋骨。四方四時之令。內通肺腎心肝十二經脉。合地之十二經水。十一藏府應天之六律五音。天地日月配形身之上下。人與天地參也。生長收藏隨寒暑之往來。而人亦應之。脉隨呼吸應周天之二十八宿。營隨衛轉合晝夜之百刻。陰陽十二經中分是動所生之病證。五藏脉法有緩。

急滑濇之提綱。論五藏神。內含五情五志。分五形人。外具五色五音。察面王。卽知藏府之凶吉。審形氣。便知壽命之短長。論氣之陰陽清濁。有順有逆。味之酸辛甘苦。有忌有宜。論內傷之病。分別陰陽喜怒。外感之疾。各有部署。形層百病之起。有寒熱虛實。湯液之法。有補瀉溫涼。其間義理精微。不能盡述。苟非生知睿聖。焉能洞察隔垣。誠三才之原始。實醫學之上乘。後世視爲鍼經而忽之。醫者能明正氣之生始出入。而後知邪病之虛實淺深。舍根本之大道。而反循末務。設遇盤根錯節。靡不意亂心迷。若能潛心此經。自

然出類拔萃

傷寒書論

世傳傷寒論乃斷簡殘編藉王叔和編次聿稽仲景生于東漢叔和西晉時人相去止百餘歲不遭秦火之劫奚爲斷殘乎第經義淵微鮮有通其義者故輒詆傷寒論爲非全書聾瞽來學實仲景罪人也今世之醫有終身目不識者獨執陶氏六書以爲枕中鴻寶夷考陶氏剽南陽唾餘分別門類將經中語氣皆爲斷截若學者熟讀全書細心體會其中義理如神龍出沒首尾相顧一字一句條分縷析鱗甲森然得

其蘊奧自有精華滋味。非比塵垢糠粃。以上多係王肯堂語

### 金匱要畧論

所謂要者。得其綱領也。知其要者。一以貫。十以貫。百可千。可萬。一言而終。不知其要。流散無窮。此之謂也。內如婦人娠妊。章云。懷身七月。太陰當養。不養。此心氣實。當瀉。勞宮類而推之。則知八月有手陽明之當養。不養矣。十月之中。各分主養之藏府。而各有當養不養之患。若止以七月論之。是舉一隅而不以三隅反也。學者潛心此書。得其要而引伸之。天下之理其庶幾乎。

診法論

夫診脉察色。昉于靈素諸經。西晉王叔和因傷寒論。金匱要略。編緝脉經十卷。內雖採用經語。其中不無杜撰。且多七表八裏之蛇足。圖畫七竒八怪之形狀。疑惑後學。反多岐路之悲。五代高陽生假叔和名。撰脉訣二卷。然亦有所長在。叔和脉經又未可爲全璧。是以學者當宗法靈樞素問。及仲景平脉辨脉諸法。靈樞有緩急大小滑濇之提綱。素問有左右前後上下之診法。益以形身之上下四旁以應天地六合之道。又王部九候之法。有天道焉。有人道焉。有地道焉。

謂人居天地氣交之中人與天地參也經脉篇論六  
藏脉屬藏絡府六府脉屬府絡藏脉要精微論以尺  
脉候腎左附上以候肝心右附上以候脾肺蓋以兩  
腎爲先天始分之水火而生木火土金之五行也藏  
府之雌雄配合經脉之屬絡相連是以高陽生有左  
心小腸肝膽腎右肺大腸脾胃命之歌蓋亦有所本  
也本論以右附上候脾胃則心與小腸肺與大腸不  
言而可知矣後人妄生別論皆未曾參究內經  
平脉篇有三菽六菽之診法謂皮脉肉筋骨乃肺心  
脾肝腎之外合故以舉按輕重以候五藏之氣也此  
四診之法咸宜明了于心中隨機應變于指下兼之



審證察色而診道始備。至如褚澄儲泳諸君之論。不  
拘經理。反覆陰陽顛倒藏府置之勿問。可也。

### 識脉論

或曰。識脉其難乎。余曰。子但知識脉之難。而不知審  
脉之更難也。所謂識脉者。如滑伯仁之診家樞要曰。  
浮不沉也。沉不浮也。遲不及也。數太過也。虛不實也。  
實不虛也。滑不濇也。濇不滑也。長不短也。短不長也。  
大不小也。小不大也。緩不速也。弱不盛也。伏不見也。  
奕無力也。微不顯也。散不聚也。洪洪大也。細微細也。  
代更代也。牢堅牢也。動者滑大于關上也。弦者狀如

弓弦按之不移。繫者如轉索無常也。芤者浮大而按之中空。革者中空而外堅也。結者緩而有止。促者數而有止也。以對待之法識之。猶易分別于指下。所謂審脉者。體認所見之脉。何因所主之病。何證以心印之。而後得也。平脉篇曰。浮爲在表。沉爲在裏。數爲在府。遲爲在藏。又曰。浮則爲風。浮則爲熱。浮爲氣實。浮爲氣虛。浮則無血。浮則爲虛。是將爲外感乎。爲內傷乎。爲氣乎。爲血乎。爲實乎。爲虛乎。是必審其證之表裏陰陽寒熱虛實病之久病新病。脉之有力無力而斷之以意也。如扁鵲知桓侯疾之淺深。望而知之也。

知號太子不死。問而知之也。華佗聞呻吟之聲而取蛇毒。聞而知之也。後人惡能及二君之神智。然必四診咸備而後可保萬全。故曰審脉之更難也。

音聲言語論

音聲者。五音之聲。嘹亮而有高下者也。語言者。分別清濁字面。發言而有語句者也。土者其數五。五者音也。故音主長夏。是音聲之發于脾土而響于肺金也。在心主言。肝主語。心開竅于舌。舌者音聲之機也。肝脉循喉嚨入頰頰喉嚨者。氣之所以上下者也。頰頰者。分氣之所泄也。肝心氣和而後言語清明也。然又

從腎間動氣之所發故腎氣虛者音聲短促上氣不能接下氣矣是以發言歌咏出于五藏神之五志故有音聲而語言不清者當責之心肝能語言而無音聲者當責之脾肺能言語音聲而氣不接續者當責之兩腎聞乃四診之一不知音聲之原委又安能審別其病情乎

脉要精微論曰聲如從室中言者是中氣之濕也

望色論

盧不遠先生曰嘗讀桓公合諸侯衛人後至公朝而與管仲謀伐衛退朝而入衛姬望見公下堂再拜請衛君之罪公曰吾于衛無故子盍爲請曰妾望君之

入也。足高氣強，有伐國之志也。見妾而有動色，伐衛也。明日君朝，揖管仲而進之。管仲曰：「君舍衛乎？」公曰：「仲父安識之？」仲曰：「君之揖朝也，恭而言也。徐見臣，有慙色，臣是以知之。」又公與管仲謀伐莒，謀未發而聞于國。桓公怪之，仲曰：「國必有聖人也。」公曰：「譖日之役者，有執柝杵而上視者，意者其是耶？」乃令復役。少頃，東郭牙至。管子曰：「子邪言伐莒者？」對曰：「然。」仲曰：「我不言伐莒，子何故言伐莒？」對曰：「臣聞君子善謀，小人善意，臣其意之也。」仲曰：「子何以意之？」對曰：「臣聞君子有三色：顯然善樂者，鍾鼓之色也；愀然清靜者，衰經之

色也。艷然充盈手足矜者，兵革之色也。目者，臣望君之在臺上也。艷然充盈手足矜者，此兵革之色也。君呿而不驗，所言者莒也。呿邱加切音佞張口貌君舉臂而指，所當者莒也。臣竊以慮諸侯之不服者，其惟莒乎？此例于醫爲望法之第一義也。何必五色精明象見哉？此三人者，專心事桓，故見其動容貌而知其用舍。若能專心事病人，則一望所楚深達其自己欲言而未能者矣。死生吉凶，其未事乎？若季札聞樂所言，是又聞法之第一義也。

問因論

內經曰治之極于一者因得之閉戶塞牖繫之病者數問其情以從其意得神者昌失神者亡蓋得其因則能定其名能定其名則知所以治矣夫病又有脉證之相應者有不相應者有病久而重感于新病者有外感風寒而復內傷五志病不以次入而乘傳者故當詳審其受病之因所病之苦察其志意得失神氣存亡飲食嗜欲居處房勞參合脉證以意逆之然又不可惑于病家之言而無果斷也予治一少年傷寒三四日頭痛發熱胸痛不可按病家曰三日前因食麵而致病者予曰不然麪飯糧食何日不食蓋

因外感風寒以致內停飲食。非因食麵而爲頭痛發熱者。故凡停食感寒。只宜解表。不可推食。如裏氣一鬆。外邪卽陷入矣。夫食停于內。在胸下胃脘間。按之而痛。今胸上痛。不可按。此必誤下而成結胸病。家云。昨延某師。告以食麵之因。醫用消食之藥。以致胸中大痛。予診視外證。尚有仍用桂枝湯加減一服而愈。又一隣女。年十三四。始出痘。至七八日。漿尚未化。醫措藥。竟其父云。家中事務俱是此女料理。平日極辛苦者。醫聞之。復大加黃芪白朮。服後甚覺不安。次日醫知誤投。芪朮復用。清涼解毒。角刺甲片攻之。毒不



能化遂成不救此皆惑于病家之言不能主持過耳  
聊記此二者以爲聽言之鑑

### 傷寒傳經辨

夫陰陽之道一陰一陽分而爲三陰三陽三陰三陽  
應藏府之十二經脉是無形之氣合于有形之經在  
經脉有手足之分在六氣止論三陰三陽而無分手  
與足也風寒暑濕燥火天之陰陽也在人亦有此陰  
陽之六氣如太陽之上寒水主之寒水者膀胱之水  
也太陽者巨陽之氣水中之生陽也靈樞經曰膀胱  
者毫毛其應是太陽寒水之在下而巨陽之氣衛于

通體皮毛之間。夫邪之中人。必先始于皮毛。故凡傷于寒。則爲病熱。是天之寒邪。病太陽之陽氣。得陽氣而寒反化熱也。天之寒邪。病寒水之氣。同氣相感也。太陽寒水之經脉。上循于頭項。故見頭項強痛之證。此病氣而及于經。非經氣之兼病也。如邪溜于經。則爲桃仁承氣之下證。不復再傳陽明矣。經曰。厥陰之右。少陰治之。少陰之右。太陰治之。太陰之右。少陽治之。少陽之右。陽明治之。陽明之右。太陽治之。是以一日太陽。二日陽明。三日少陽。四日太陰。五日少陰。六日厥陰。七日來復。于太陽。如不作再經而病自愈矣。此六氣之相傳也。

如邪留于陽明則見白虎湯之渴證承氣湯之燥證  
不復再傳少陽矣如邪留于少陽則見往來寒熱之  
柴胡湯證不復再傳太陰矣如邪留于太陰則見脾  
家實腹滿時痛之腹證不復再傳少陰矣如邪留于  
少陰則見自利而渴之經證不復再傳厥陰矣如邪  
留于厥陰則見下利膿血之熱證不來復于太陽矣  
此始病太陽之氣得陽氣已化熱故雖傳留于三陰  
而皆爲熱證至于不能化熱及直中三陰之陰證又  
當別論夫六氣相傳止見太陽之頭痛至七日以上  
自愈者以行其經盡而來復于太陽不見六經之證

也。如見少陽證則爲邪留少陽。見少陰證則爲邪留少陰。非病在少陽而再傳太陰。病在少陰而再傳厥陰之理也。先賢見太陽病而復見陽明證者曰此循經傳也。見太陽病而後見少陽證者曰此越經傳也。見太陽病而後見太陰證曰此誤下傳也。見太陽證而後見少陰證者曰此表裏傳也。越經誤下之說皆係杜撰夫太陽之邪傳留于某經則見某經之病不復再傳別經。非六氣相傳而七日來復于太陽之傳經也。皆緣不明陰陽經氣之道。不識仲景之書而妄爲臆說如此。又太陽標陽而本寒。少陰標陰而本熱。陰陽水火之

氣交相感。各故有病。太陽而傳于少陰者。此亦氣相

感而不涉于經也。有病在太陽而爲心下煩悶者。先

輩曰。此壬水逆傳于丙。丙丁兄妹相傳。此更爲不通

之說也。

以上論六氣相傳。以下論傳足不傳手。

夫六氣運行四時代序。

總屬寒暑往來。而皆歸于地。故人亦應之。如君相二

火。發原在腎。太陽之氣。生于膀胱。風氣本于肝木。濕

氣本于脾土。燥氣本于胃金。腰以上爲天。腰以下爲

地。三陰三陽之氣。皆從陰而生。自下而上。故素問厥

論曰。陽氣起于足五指之表。陰氣起于足五指之裏。

是以陰陽六氣止合足之六經。靈樞本輸篇曰。五藏

六府之輸五五二十五輸六六三十六輸六府皆出  
足之三陽上合于手者也是三陰三陽之氣止合足  
之六經足之六經上合于手者也是以天之寒邪始  
病太陽膀胱之氣六氣相傳止見足經之證而不與  
手經相涉天之六淫病人之六氣太陽之上寒氣先  
治之與手太陽之小腸火毫無干涉先  
輩有以手經皆爲有餘足經皆爲不足之說者有以  
足六經屬水土木手六經屬金與火之說者有以上  
體多受風熱下體多感寒濕之說者嗟嗟傷寒之理  
甚難挈其綱領示以大道尚不能窺仲景之藩籬若  
再多旁岐之說使後學更無歸着矣予故設此辯匪

敢政前賢之是非聊以俟後人之詳審爾

· 陽證陰證辨

夫內經之所謂未滿三日者可汗而已其滿三日者可泄而已蓋謂熱病而言也故篇名熱論熱病者寒邪在于表之三陽寒已化熱故可汗而已如不從汗解則熱邪已入于裏陰故可下而已若寒邪在表而不能化熱及表陽虛脫者太陽經有四逆湯之寒證寒邪直中于裏陰感君相二火之熱化者少陰經有急下之火證厥陰經有便膿血之熱證此皆從人身中之氣化也故邪在三陽曰陽證能化熱曰熱證不

能化熱曰寒證在三陰曰陰證病陰寒曰寒證得火  
化曰熱證又不可以病在陽而定爲熱病在陰而必  
爲寒也

、陽劇似陰陰劇似陽辨

陽劇似陰者謂厥深熱亦深也厥陰篇曰傷寒一二  
日至四五日厥者必發熱前熱者後必厥厥深者熱  
亦深厥微者熱亦微所謂傷寒一二日者謂一日病  
在太陽二日病在陽明寒已化熱至四五日而后傳  
入于裏陰故曰必發熱言傷寒一二日必前發熱至  
四五日而后厥也深重微輕也蓋熱邪深入而裏氣



不能外達。故熱深而厥亦深也。如此者。當知一二日之間。邪在表。陽曾發熱而後傳入于裏。陰也。一日必見太陽之頭。所謂陰劇似陽者。乃寒邪直中于裏。陰盛而格陽于外。是以喜寒惡熱。揭去衣被。欲臥涼處。如此者其人必躁。其脉沉細。或虛浮而亂。其舌必滑。其面色必清。或赤浮于外。其膚必涼。或發熱者。必先涼而后熱。以手按之。始覺壯熱。久之反涼。此二者先詳審其因證。而假象自露矣。若猶恐陽劇似陰。陰劇似陽。先以此搖惑于心中。則反有差誤。

、陰證本于陽虛辨

陽者天氣也。主外。陰者地氣也。主內。故陽在外。陰之  
使也。陰在內。陽之守也。是以人之三陽。猶外之重門。  
人之三陰。猶內之堂室。邪中于陰。而爲陰證者。乃重  
門不固。本陽虛也。雖然。外城已破。內城尚可固守。蓋  
陽生于陰。裏氣實者。猶能外禦其侮。若表氣微虛。裏  
氣不守。則使邪中于陰矣。有一方士。華輿盛服。昂昂  
然至病者之家。審其脉。證虛寒。曰。此陰證也。病者曰。  
不然。予保養數月矣。病者之妻亦大愠于側。佯哂而  
譏之。方士赧言語澀。遂不敢用溫熱之藥。貿貿然而  
出。若有所失。悲夫。不明陰陽之道。而爲醫。猶未能操

戈而使之戰也。

開之曰陰陽之道。陽密爲要。如陽氣不固。則邪不以次入。憂恐悲喜怒。皆傷五藏。邪卽隨所傷之藏而乘之。又非獨腎精之能固守也。

、邪正虛實辯

岐伯曰。夫百病之始生也。皆生于風雨寒暑。陰陽喜怒飲食居處。大驚卒恐。則血氣分離。陰陽破散。經絡厥絕。脉道不通。陰陽相逆。衛氣稽留。經脉虛空。血氣不次。乃失其常。通評虛實論曰。邪氣盛則實。精氣奪則虛。又曰。邪之所湊。其正必虛。是凡病未有不爲邪。

氣所傷而卽爲正氣虛脫者也是以大骨枯槁大肉陷下胸中氣滿喘息不便皆因外感風寒內傷五志之所致故凡病當先却其邪調其血氣順其所逆通其所積則陰陽和平而正氣自復若止知補虛而不清理其病邪病一日不去正氣一日不復漸積至久而成不救之虛脫矣又常見少年子女因感外邪而爲發熱欬嗽或爲唾血或爲夜熱不行清理其邪而致陰陽破散血氣乾枯有不數月而死者有不周歲而死者而曰此百日怯也此周年怯也悲夫夫少壯之人精神日盛血氣日生若不因邪病而成虛怯未

之有也。有不因邪病而成虛怯者。奇恒之病也。

不因外感

內傷故曰奇恒。大奇篇曰。胃脉沉鼓濇。胃外鼓大。心脉小堅。

急。皆鬲偏枯。男子發左。女子發右。年不滿二十者。三

歲死。

從內而外故曰發

夫人之榮衛血氣。皮肉筋骨皆資生

于胃府。水穀之精。胃脉沉鼓濇者。胃虛而生氣衰也。

血氣不能榮養于身。故成偏枯之證。年未滿二十者。

精神正盛。血氣方殷。而反見此衰敗之證。此因先天

所秉之元氣虛薄。而後天不能資培。斯成自損之病。

然亦至三年之久。而不致于速死。審辨邪正虛實。臨

證要緊。關頭名醫之門多疾。若能分別救治。庶幾其

有瘳乎。

陽脫陰脫辯

陰陽虛脫有外因內因之分。有偏勝偏絕之別。如邪中于陰。手足厥冷。脉微欲絕。此陰盛而生陽之氣欲絕于內也。如欲冷飲。欲臥涼地。揭去衣被。躁而不安。此陰盛于內而陽欲脫于外也。急宜參附薑桂以救之。如發汗不解。身反大熱。此陽盛而陰絕于內也。如陽明病發熱。汗多者。急下之。宜大承氣湯。此陽盛于內而陰液外脫也。此外因之陰陽偏勝而偏絕也。若夫內因之陰陽。陽生于陰。陰生于陽。陽生于陰者。陽

氣生于陰精也。陰生于陽者。陰精之生于陽化也。陽化者。陽氣化水穀之精微而生此精也。陰陽和合交相生化。是爲平人。如孤陽不生。獨陰不長。此陰陽之生機欲絕于內也。難經曰。脫陽者見鬼。脫陰者目盲。蓋陽脫者。從下而脫于上。陰脫者。從上而脫于下。故脫陰而目盲者。尚有餘命之。苟延脫陽而見鬼者。不計日而死矣。夫陽脫之患。多有本于陰虛。如年老之人。足膝寒冷。此元陽之氣漸衰。而欲絕于下。宜用參附半硫之類。以助生陽。如或因脾胃虛而穀精不生。或入房甚而腎精日損。或憂恐而藏精漸消。或煩勞

而精神日耗以致陰氣日衰而陽將外脫矣。故治未  
病者見陰精有虧乃陽脫之漸預培養其陰焉。若待  
陽氣外脫用桂附而欲其引火歸原不知陰精者陽  
氣之生原也其原已絕又安所歸乎。故陽脫而用桂  
附救之者外因之脫也。治內因而用桂附者助陽氣  
之衰于下也。若陰虛而陽脫者非桂附可救故曰陰陽虛脫有外因  
內因之分有偏勝偏絕之別。

### 病有新故辯

夫新病者多宜于清解久病者多宜于補養。根結篇  
曰形氣不足病氣有餘是邪勝也。急瀉之。形氣有餘



病氣不足。急補之。形氣不足。病氣不足。此陰陽俱不足也。不可刺之。刺之則重不足。重不足。則陰陽俱竭。血氣皆盡。五藏空虛。筋骨髓枯。老者絕滅。壯者不復矣。形氣有餘。病氣有餘。則陰陽俱有餘也。當瀉其邪。調其虛實。故曰。有餘者瀉之。不足者補之。此之謂也。脉要精微論曰。徵其脉小。色不奪者。新病也。徵其脉不奪。其色奪者。此久病也。徵其脉與五色俱不奪者。新病也。是凡病皆當審其形氣色脉。而分別其新故焉。然又有病久而重感新病者。又當清解其邪。而調其虛實。若見其病

氣有餘則以爲病久而變劇仍用久病之法治之以致中道天而不終其天年乃不審新故之過耳夫血氣壯盛者尚爲邪所中況久病之人血氣虛衰腠理不密寧保其不復爲邪氣之所傷乎

飲酒傷脾辯

夫飲入于胃遊溢精氣上輸于脾脾氣散精上歸于肺通調水道下輸膀胱水精四布五經並行是入胃之飲從在內之脾肺四布于皮毛下輸于決瀆而爲津爲溺乃從內而外也酒入于胃隨衛氣而先行皮膚先充絡脉絡脉先盛衛氣已平轉入于經而經脉

大盛是反從外而內也。蓋酒者水穀之悍液，衛者水穀之悍氣，故隨衛氣而先行皮膚，是以飲酒者面即赤而小便獨先下，乃先通調于外而下輸也。其充滿于經脈者，復歸于脾肺，是以醉飽入房，多成中滿，咽隔欬嗽吞酸之病，蓋留積于內，不復通調于外，致傷脾肺故爾。

發汗利水辯

夫汗之生源有二：一出于充膚熱肉之血，血之液化而爲汗，此表汗也；一出于陽明胃府，乃水液之汗也。是以表汗止可微取，恐血液傷而陽氣脫。若水液之

汗不妨如水淋漓。麻黃湯發表之劑也。麻黃空細如毛。能開發皮毛間之閉邪。植麻黃之地。冬不積雪。能通陽氣于至陰之下。又肺主皮毛。故配杏子以利肺氣。葢內竅通而外竅始通也。如配石膏。乃直從陽明而發水液之汗。又非發表之劑矣。配一味卽大相逕庭。立方加減可輕忽如小便不利者。用麻黃杏子配八正散。內加二味。其應如響。葢外竅通而內竅通。上竅通而下竅卽利矣。予在菖溪。治一水腫者。腹大膚腫。久服八正散。琥珀散。五子五皮之類。小便仍淋漓。痛苦萬狀。予曰。此雖虛證。然水不行。則腫不消。腫不消。則正氣焉能平。

復時值夏月。予不敢用麻黃。恐陽脫而汗漏不止。以  
蘇葉防風杏子三味各等分。令煎湯溫服。覆取微汗。  
而水卽利矣。次日至病者之室。牀之上下。若傾數桶  
水者。被褥幃簿無不濕透。病者云。昨服藥後。不待取  
汗而小水如注。不及至溺桶而坐于牀上行之。是以  
牀下如此也。至天明不意小水復來。不及下牀。是以  
被褥又如是也。今腹滿腫脹俱消。痛楚盡解。深感神  
功之救我。予曰。未也。此急則治其標耳。子之病因火  
土傷敗。以致水泛。乃久虛之證也。火卽人之元氣。必  
待脾氣元氣復而后。可保其萬全。予卽解維寫一六

君子方去甘草加蒼朮厚朴炮薑熟附子每日令濃煎溫服卽以此方令合丸藥一料每日巳未時服之卽止其湯藥半載後病者之兄備土物來謝曰吾弟已全愈矣予曰如此之證水雖行而正氣不復後仍腫脹而死者比比此命不應絕非予之功也雖然邪之所湊其正必虛若初腫之時行去其水正氣易于平復醫者不知發汗行水之法惟以疎利之藥利之腫或減而無尾閭之洩猶以隣國爲壑耳如久服疎利之藥則正氣日消水畱日久則火土漸滅然後以此法行之無濟于事矣

、癰勞鼓膈爲難治之因辯

夫飲入于胃。猶海之行雲氣于天下。穀入于胃。由脾土之轉輸于四旁。是以水穀之津液。各走其道。五藏六府皆以受氣。皮肉筋骨咸以資生。故曰清陽發腠理。濁陰走五藏。清陽實四支。濁陰歸六府。是止濁中之濁者。歸于大腸。小腸膀胱而爲糞爲溺也。夫勞怯膈脹之證。或久嗽而傷肺。或鬱怒以傷肝。或不得志意而心脾之氣不舒。或過于勞傷而腎藏之精漸絕。入胃之藥食不能輸布于五經。惟走腸胃而爲穢濁。故雖久服而毫無效驗也。卽悞服其藥餌。亦不覺其

有損用參苓之神品亦不能受其精華此皆鬱逆之爲故耳以致精神日減肌肉日消而漸無生氣矣脹滿之病在于腸胃之外郭郭之中如脾不運行則藥食更不能及知陰陽升降之理五行運化之道者先當理其脾胃焉土氣化而灌溉四旁坤德厚而資生萬物津液生而陰火伏地天泰而否隔消脾氣運行則脹滿日減筋骨濡潤則癰瘕可強此端本澄源之大道也若不知治本惟以涼潤之藥欲其降火生津潤下飲食夫脾喜燥而肺惡寒脾土濕則不能輸運肺氣寒則不能通調以致津液不生痰涎反甚陰火



炎而欬嗽頻上下否而隔脹愈劇矣。陰火不可撲滅  
遇水愈熾得所生之真精而后能制之

能醫傷寒卽能醫痘疹能醫痘疹卽能醫癰毒

辯

學士許叔微曰能醫傷寒卽能醫痘疹能醫痘疹卽  
能醫癰毒蓋能醫傷寒者知表裏陰陽寒熱氣血邪  
正虛實耳傷寒之邪從外而內痘疹之毒從內而外  
若夫癰毒有因于風寒暑濕之外襲者有因于喜怒  
飲食之內傷者是以傷寒痘疹癰毒皆當審其表裏  
虛實而治之如痘證之表實者當清解其表裏實者

卽疎利其裏血熱者涼血氣逆者理氣邪毒盛者急  
宜清熱解毒正氣虛者又當兼補其正焉氣虛者補  
氣血虛者補血表虛者固表裏虛者實裏是以治痘  
有寒熱溫涼之方有攻解補瀉之法蓋瀉者瀉其熱  
毒補者補其正虛昔錢氏痘方多用清涼謂當清熱  
解毒爲要陳氏專用溫補謂血氣充足而后能化毒  
成漿此皆偏執一見而不得中正之道者也故爲兒  
醫者當以二氏之方折中其間審其邪正虛實而治  
之萬無一失矣至于癰毒之證與痘證無二而治法  
亦同如陰毒在內而不起發者卽痘毒之內陷也根

盤收斂而高聳者卽痘之界地分明而起脹也。膿稠者卽痘之漿厚也。無膿者卽痘毒之不化也。能食者卽痘毒之盡發于外也不能食者毒氣尚壅滯于內也。收口者卽痘之結痂也。臭爛者卽痘之珊爛不收也。或解或攻或補或瀉皆當以治痘之法治之。古來瘍醫咸以爲痛癢瘡瘍皆屬于火。惟以寒涼之藥治之。或毒反冰伏而不起者。或始終用攻利之藥。致正氣虛脫而後成不救者。噫。爲兒醫瘍醫者。能潛心于靈素仲景諸書。功德無量矣。

、乳癰鼠癭辯

一婦人產後乳上發癰腫脹將半月周身如鍼刺飲食不進余診之六脉沉緊有力視左乳連胸脇皆腫予用麻黃葛根荆防杏子甘草石膏令溫服取汗次日復視之曰昨服藥後身有大汗而周身之痛盡解乳上之腫脹亦疎飲食亦進服藥不啻十有餘劑毫無效驗矣此劑有如是之功也予曰金匱要畧云產後婦人喜中風生氣通天論曰開闔不得寒氣從之榮氣不從逆于肉理乃生癰腫此係風寒外壅火熱內閉榮衛不調以致腫痛諸醫止以涼藥治熱而不知開闔故也今毛竅一開氣機旋轉榮衛流行而腫

痛解矣。內經云：食氣入胃，散精于肝，此腫屬陽明厥陰。二經是以飲食不進。今經氣疎通，自然能食矣。又一老嫗，兩頰浮腫，每邊有核如梅子大。嫗曰：予一姪女，因生鼠瘻而死。又一甥女，亦患鼠瘻而歿。今心甚憂之。余診其脉，兩寸口皆浮大。其證則頭痛發熱，予曰：不妨。汝證乃風寒陷于脉中，而爲瘻。用解肌蘇散之劑，則愈。與姪女甥女之瘻不同。二女子之瘻，其本在藏，其末在脉，原係惡疾。有灸刺之法，載在內經骨空篇中，能依法治之，亦不至于死。此緣失于救治者也。吁！治癰瘍者，可不知內經乎？

能食而肌肉消瘦辨

胃乃受納之府。脾爲轉運之官。故水穀入胃。得脾氣之轉輸。而後能充實于四支。資養于肌肉。胃爲陽。脾爲陰。脾與胃以膜相連。陰陽相交。如能食而瘦者。陽與陰絕也。夫陽明不從標本。從太陰中見之化。陽明乃燥熱之府。不得太陰之濕化。則悍熱之氣更盛。脾不得稟水穀之氣。則太陰之氣愈虛。是以胃中熱則消穀。善飢。脾氣虛則肌肉日瘦。盛者愈盛。而虛者愈虛。漸至五有餘而二不足。則死不治矣。夫人參甘草半夏橘皮生薑之類。乃助胃之品也。白朮蒼朮山藥

黃芪厚朴茯苓乾薑大棗之類乃助脾之品也枳實黃連大黃石膏麻仁芍藥之類乃抑胃之藥也經言強者抑之弱者扶之不知藥性之所主不分強弱之資抑是以強者仍強而弱者仍弱矣陽明篇曰胃氣生熱其陽則絕又曰浮則胃氣強其脾爲約麻仁丸主之此陽與陰絕而用抑強之法也

張開之曰此外因之新病故止用抑強之法如病久而肌肉消瘦者當以助脾之藥爲君宣胃之藥爲臣使胃氣與脾氣相通瀉胃之藥爲佐斯爲正治之法

、奇恒論

夫病之生于內傷外感人所共知而奇恒之病知之者鮮矣。所謂奇恒者異于恒常也。乃陰陽偏勝五行逆傳審證辨脉大有徑庭。內經之論疾病者不及二十餘篇。論奇恒之章有八。學者當用心參究。庶免五過之責。

利論

古文作利  
今文作痢

夫利有三因。因于外感風寒暑濕而爲下利膿血者。有死有生。有氣有血。宜補宜瀉。宜寒宜熱。具在傷寒論金匱要略及千金諸方。各宜隨證而分別治之。又有陽中霧露之氣。陰中渾濁之邪。血凝自下。狀如豚



肝陰陽俱厥脾氣孤弱五液注下下焦不闔清便下重今便數難臍築湫痛命將難全詳論辨脉篇中此外因之下利也有因食飲不節起居不時陰受之而入五藏則填滿閉塞下爲殄泄久爲腸澼此內因之下利也有因于奇恒之下利者乃三陽并至三陰莫當積并則爲驚病起疾風至如礪礪九竅皆塞陽氣滂溢乾嗌喉塞并于陰則上下無常薄爲腸澼其脉緩小沉澼血溫身熱死熱見七日死蓋因陽氣偏劇陰氣受傷是以脉小沉澼此證急宜大承氣湯瀉陽養陰緩則遂成不救醫者不知奇恒之因見脉氣和

緩而用平易之劑。又何異于毒藥乎。予故曰。服平和湯而愈者。原不死之病。勿藥亦可。服平和湯而後成不救者。醫之罪也。

、中風論

夫邪之中于人也。有皮肉筋骨府藏之淺深。有陰陽寒熱燥濕之氣化。況風之善行而數變。是以傷于皮毛。則爲頭痛發熱欬嗽。鼽涕之輕。證入于血脉。則肌膚不仁。或爲癰瘍。或爲腫癭。邪在肌肉筋骨。則爲痛痺。或爲拘攣。或爲偏枯。邪入于腹。或爲飧泄。或爲燥結。邪入于腑。卽不識人。邪入于藏。舌卽難言。口唾痰。

涎此邪入之有淺深而病之有死生輕重也夫天有六淫之邪人有六氣之化邪襲于陽則爲熱化中于陰則爲陰寒濕盛者則痰涎上壅燥盛者則腸胃下結邪氣盛者則病氣形氣皆盛正氣虛者則病氣形氣皆虛總屬天之風邪而人身中有寒熱燥濕虛實之化是以河間謂中風主于火丹溪謂主于痰東垣謂主于氣又曰中風之病惟年老者有之此皆未明陰陽氣化之道也夫喎僻拘攣目斜不語在童稚則爲急慢驚風在少壯則爲中風卒暴予一姪女年二十餘體甚豐厚精神強旺六月盛暑恒貪風涼臨窗

露臥忽一日頭大痛身熱無汗口不渴而躁手足拘急口眼喎斜余診之六脉沉細予曰邪已入藏此危證也次日卽不能言口唾涎藥亦不受病三日而死如此之候年少壯盛者比比又非獨于老人也經曰夏傷于暑冬傷于寒是夏月止有風暑而無寒邪卽見陰寒之證而宜于薑附之熱藥者乃邪中于裏陰而不得陽熱之化非天之寒氣也夏月陽氣盡發越于外而裏氣虛寒時下名流咸以此證爲中寒予微哂之曰是固知年少之無中風也若謂少壯之人血氣充實而不爲風邪所中是亦不應中寒中暑矣此習俗之固弊牢不

可破者也。或曰：然則老年之多中風者，何氣使然？曰：年老之人，天癸已絕，血氣虛衰，腠理不密，故易于受風。且精氣竭而痰火盛，是以有因痰、因火、因氣之說焉。夫客氣邪風，中人多死。若五藏安和，元真通暢，不使形體有衰，病則無由入其腠理。靈樞經曰：八風之邪，皆從其虛之鄉來，乃能病人。三虛相搏，則爲暴病卒死。兩實一虛，則爲淋露寒熱。其有三虛而偏中于邪風，則爲擊仆偏枯。故聖人避風如避矢石，是聖人之教化，又何嘗有年老少壯之分也。

頭痛論

夫但知三陽之脉上循于頭而爲頭痛不知厥陰與督脉會于巔而少陰之骨髓通于腦也止知風寒火熱在頭而爲頭痛又不知足六經之證上逆于頭而爲厥頭痛也足六經之氣能厥逆于頭而爲頭痛又當知寒邪入腦亦能傳于厥陰少陰而爲陰證也真頭病者頭痛甚腦盡痛手足寒至節死不治

### 心痛論

夫咸謂心痛者乃胃脘當心而痛不知有厥心痛也厥心痛者四藏之氣逆客于心下而爲痛也心痛與背相控善瘳如從後觸其心僂僂者腎心痛也心痛

如以錐鍼刺其心。心痛甚者。脾心痛也。心痛色蒼蒼如死狀。終日不得太息者。肝心痛也。臥若徙居。心痛間。動作痛益甚。色不變。肺心痛也。胃脘當心而痛者。上支兩脇。膈咽不通。食不下。各審其脉證。而隨經取之。分別寒熱虛實而治之。無有不效者矣。若真心痛者。手足青至節。心痛甚。旦發夕死。夕發旦死。

### 腹痛論

腹者。太陰之宮域。腸胃之郭郭。病滿痛者。有入府于藏之分。有緩急輕重之別。如卒暴絞痛。面青肢冷。此邪直干陰分。急宜刺洩其邪。如暴吐下利。此邪傷陽。

明名曰霍亂。若發熱頭疼爲欲愈也。如厥逆脈脫急  
宜理中圓。甚者加附子。晡時脈還手足溫者生。不復  
則死。此邪甚而胃氣絕也。如腹痛下利而能食者。乃  
邪入于腸中。利止則愈。此皆直中于內而有藏府輕  
重之分焉。又有邪傳五藏而爲腹痛者。始發于皮毛  
腠理。正氣不能禦邪。洋溢于血脉中而傳溜于內。大  
氣入藏。腹痛下滯。此滯傳敗絕之證。不及二十日而  
死。雖虛扁再生亦不能救。此證多有不究心者。悠悠  
忽忽。反爲病家怨尤。

消渴論



病陽明之燥熱而消渴者白虎湯主之。此外因之渴也。胃氣弱而津液不生者人參湯主之。此內因之渴也。有脾不能爲胃行其津液肺不能通調水道而爲消渴者人但知以涼潤之藥治渴不知脾喜燥而肺惡寒試觀泄瀉者必渴此因水津不能上輸而惟下泄故爾以燥脾之藥治之水液上升卽不渴矣故以涼潤治渴人皆知之以燥熱治渴人所不知也。

、  
欬嗽論

欬者肺證也。有邪在皮毛而爲肺欬者有五藏受邪各傳與之肺而爲欬者此外因之。欬也有寒飲食入

胃從肺脉上至于肺則肺寒而欬者有藏府之鬱熱上蒸于肺而爲欬者此內因之欬也蓋肺者五藏之長也輕清而華蓋于上是以藏府之病皆能上傳于肺而爲欬然其標見于肺而其本在于藏府之間故當以標本之法兼而行之治無不應矣欬論曰肺欬之狀欬而喘息有音甚則唾血心欬之狀欬則心痛喉中介介如梗狀甚則咽腫喉痺肝欬之狀欬則兩脇下痛甚則不可以轉轉則兩胛下滿脾欬之狀欬則右脇下痛陰陰引肩背甚則不可以動動則欬劇腎欬之狀欬則肩背相引而痛甚則欬涎胃欬之狀

欬而嘔嘔甚則長蟲出膽欬之狀欬嘔苦汁大腸欬  
狀欬而遺矢小腸欬狀欬而失氣氣與欬俱失膀胱  
欬狀欬而遺溺三焦欬狀欬而腹滿不欲食飲

### 砂證論

所謂砂者身上有斑點如砂或用麻刮之則累累如  
硃砂故名曰砂此乃風寒濕邪或山嵐瘴氣襲于肌  
皮之間皮者肺之合肌者脾之合肺主氣而脾主腹  
邪內于肺則氣逆而面青支冷于脾則腹中絞  
痛故淺者刮之深者刺之使邪氣外洩而痛可止若  
邪甚而失于救刺則邪于藏而氣機不轉卽不能救

矣。近時名曰斑砂。宜刺百會。蓋刺百會出血。名爲開  
瘡門。瘡卽斑疹。故以治瘡之法治之。若非熱盛發斑。  
又不必取百會矣。虞天民醫學正傳曰。治砂證。或先  
用熱水蘸搭臂膊。而以苧麻刮之。甚者鍼刺十指出  
血。或以香油燈照視胸背。有紅點處。皆烙之。是斑點  
之說。其來舊矣。焮烙之法。有行之矣。近時以爲新有  
之斑砂。乃失于涉畧故耳。夫熱邪在于皮膚。或寒邪  
化熱而後成斑。若卒中而卽入于內者。面青支冷。有  
何斑點。若不急刺。則爲卒死。又何假于照焮乎。

、痘論

痘疹之論自昔及今不啻百有餘家然不叅究靈素諸經不知藏府血氣之生始出入是以止知順險逆之證而不知順險逆之因不知其因則不能用救治之法矣夫人秉陰陽水火之氣而成此形蓋有正氣必有邪淫此天地自然之理也在天地亦有淫氣是痘之毒氣已萌于有生之初夫有生之初猶太極也三月而

成形先生兩腎猶太極而分兩儀是痘之根原在腎

腎爲水臟主藏精而化血又爲生氣之原少陽之氣

乃水中之生陽上與心主包絡相合故痘之起發隨

少陽之正氣而上達于心包腎氣之交于心包必從中焦而上邪在陽明則

爲嘔逆陽明熱盛則爲發狂故痘前發驚者可治若  
候于肝脾肺外合之皮膚肌肉間毒邪不解反內傷  
于肝則發驚傷脾則泄瀉傷肺心主血而包絡主脉  
則喘急是以痘後發驚者不治  
故毒從經而脉脉而絡絡而孫從孫絡而出于皮膚  
者順也蓋痘乃精血中之火毒故走于血分而後能  
貫膿結痂若走于氣分則爲水泡白殼矣夫經絡爲  
血分皮膚肌腠爲氣分皮毛者肺之合肌肉者脾之  
合皮膚肌肉之中有充膚熱肉之血肝所主也亦爲  
氣分故痘之順者從經絡而出于皮膚是以陸續出  
而參差大小不齊根窠收斂界地分明蓋界地乃皮  
膚肌肉而不爲邪毒所傷故也血華色而潤澤根紅

頂白氣領成漿。蓋氣行脉外而血隨氣化也。所謂逆證者。走于皮膚之氣分。則一齊湧出如痱。時俗所謂肺經痘者。此也。如走于氣分而留于肌腠。則唇腫眼脹。肉先浮而痘反平塌。時俗所謂脾經痘者。此也。如走于氣分而留于充膚熱肉之血間。則皮薄而嬌紅可愛。光亮如燈。三者皆無血以成漿。終爲不救。此因毒隨氣而走于肺脾肝外合之皮膚肌肉間。實非肺經脾經肝經之痘毒也。又有一種夾疹之痘。此分走于氣分血分。故尚爲可治。若純走于氣分。雖智巧之士不能爲無米之炊矣。夫所謂險證者。乃火毒太盛。

或阻滯于腎藏或留畜于心包

毒滯于腎藏則爲腰疼肚痛寒戰咬牙甚

則紫斑黑陷毒留于心包則壯熱煩躁便血神昏

此事在良醫急施妙用表

實者解表裏實者疎裏熱毒盛者急宜清解不起發者攻發爲先此乃可生可死之急證匪延時日者也故證有重輕方有緩急若服平和湯而愈者原不死之證勿藥亦可服平和湯而後成不救者醫之罪也夫救逆之法方書原有冰肌散治痘一齊湧出服之復能斂入予謂此方平易淺薄焉能救其大逆門人金西銘在丹陽得一救逆湯方予于正漢冲先生處得一丸方以此三方斟酌增減合爲一方名曰五類



救逆丹逆證險證服之皆有奇驗至于表裏血氣寒熱虛實又在臨證之士兼以湯藥治之可也

### 五類救逆丹

龜板

用大龜底板酒炙一兩

鹿茸

大茄茸酥炙九錢

犀角

烏魚尖鎊以人氣製研萬遍九錢

地龍

去土焙燥一兩

川山甲

炒三錢

落花生

如芋者是切片焙燥三兩

血餘

用童男童女者入新礮內填滿鹽泥封口炭火煨其灰成塊研細一兩

天花粉

一兩一錢

銀柴胡

一兩一錢

當歸

太歸頭酒洗切片焙燥一兩

芩薊

真川產而大者五錢

牡丹皮

酒浸一宿切片焙燥一兩一錢

茜草

酒洗淨一兩

玄參

焙燥一兩

地骨皮

厚大者一兩

兔絲子

煮出絲焙燥一兩

連翹

七錢

附子

麝中者二錢生用

赤桂

二錢桂附能導命門火毒外出從治法也

大生地黃

一觔洗淨搗取自然汁調和前藥為丸

右為極細末入犀角髮灰和均用生地黃汁和杵

為丸如龍眼核大以上好硃砂飛過為衣天泉煎

湯空心調服一丸兒小者半丸大者可服二三丸

如見其形證不順預服此丹若十分中有三分成

膿者即有生氣矣如險證透發不起者服之即起

如毒盛而起發不快日可服二三次

如患逆證而兒能飲酒者服藥一服時飲以甜酒一盞或少頻飲幾次亦可蓋酒隨衛氣先行皮膚先充絡脉前方乃通經絡清熱毒心腎血分之藥使在內之餘毒仍走于經絡而出于皮膚復飲以酒漿使在外皮膚之毒復與絡脉相通此血氣出入之妙用也

### 附百祥丸說

兒醫錢乙字仲陽載在宋史一代之名流也專用百祥丸治痘之黑陷甚者謂能轉禍爲福故有百祥之名後人置之不用者不知物性故耳夫大戟性能洩

水味苦寒而色紫赤能瀉水中之火毒浸于水中其  
色青翠蓋從子以洩母也夫痘毒發原在腎如初起  
腰疼肚痛寒戰咬牙乃熱毒太盛不能透發此危在  
俄頃非大戟大黃芒硝之類爲釜底抽薪之法則束手  
待斃矣故表而出之

疎殺其裏則透發于外矣

張開之曰痘之初發三日主春生起脹三日主夏長  
貫膿三日主秋成結痂三日主冬藏若秋冬之不能  
收成者多緣病釀于春故熱毒雖盛而能生長透發  
內無留畜至秋冬無有不收成者卽正氣虛脫不妨  
大用溫補如使邪毒畱滯外內不清邪之所湊其正

必虛欲補其正氣則碍于熱毒欲清其熱毒又妨于正虛是以熱毒盛而不能透發者死于三五之期雖透發而裏氣不清者終成牝痺善治痘者當預防其初焉

### 玄兔丸

夫稀痘之方法雖多未有如玄兔丸之理甚精微驗若桴鼓蓋痘乃先天之毒天一生水地二生火水火相濟陰陽互交乃水中之火毒也玄乃水天之色參者參也參天地之化育者也兔絲子一名女蘿爾雅名爲玉女蓋兔乃月魄純陰之物故有玉女之稱抱

朴子云。兔絲初生之根。其形如兔。握割其血。以和丹藥。立能變化。神異之品也。夫凡物得清涼水土之氣。而後能發芽。兔絲秉純陰之性。故得火煖而絲長。此物理陰陽之妙用也。內經云。腎者至陰也。至陰者盛水也。肺者太陰也。少陰者冬脉也。故其本在腎。其末在肺。皆積水也。是肺腎天水之相通也。肺屬天玄參具水天之性。色能于水中。以清發其天花。兔絲有陰陽之妙用。能于至陰之中。而透其陽毒。是以嬰兒在百日內。與此丸服之。或服至三歲。則毒盛者稀。而毒微者不出矣。即熱毒盛者亦無險逆之虞同邑盧子由先生。五十無

子得一種子奇方卽生二男皆爲痘壞蓋種子方中  
不無多熱藥耳後復生子皆以玄兔丸服之至六十  
有五連舉六男六女俱已長成皆不爲痘疹所壞玄  
兔之功效豈淺淺哉盧氏以此爲秘方

疹論

古今名疹

痘乃先天之毒疹屬後天之邪先天止有水火後天  
始備五行產下發聲吮乳肇自後天是以發聲之時  
口中有毒卽嚙下而歸于陽明故瘡之毒氣發于陽  
明上達于肺出于皮毛肺主氣而外合皮毛是以痘  
毒走于血分而氣以化之爲順瘡毒走于氣分而血

以和之爲順。若走于血分而見雲頭紫赤吐者逆也。瘡乃氣分之毒。更速于痘。若停留于胃則爛牙齦阻滯在肺則爲鼻扇喘急發表疏裏清熱解毒事在良醫之臨證妙用者也。夫氣爲陽血爲陰。痘乃精血中毒。故應四時之生長收藏以合地支之數。瘡乃氣分之毒。是以一日三烹三而三之以應陽九之終。痘發于陰故宜頭面稀疏不喜獨熱陽位。瘡發于陽故喜大烹頭面不宜惟在心胸。此人之陰陽血氣應天地自然之道也。男玉師問曰相傳痘先出而瘡後出者爲順如瘡在痘先後要復出此亦應先天後天之義。



歟

下有缺文

治瘡主方

葛根

桔梗

荊芥

防風

杏仁

甘草

牛蒡子

橘皮

右方用泉水煎服再隨四時之氣而加減用之如寒閉者宜麻黃熱閉者宜石膏食閉者宜枳朴山查熱甚者加黃芩黃連毒甚者加白花地丁西河柳渴者加知母喘者倍杏仁裏實者加葶藶牽牛蓋瘡疹有血氣之分而用藥亦宜分別如大黃大戟血分之瀉藥也葶藶牽牛氣分之瀉藥也黃連

形壘如連珠。瀉心火之藥也。黃芩外肌皮而內腐空。故名空腸。又名腐腸。乃瀉肺而清肌表之藥也。肺主氣而心主血。故清痘之熱毒。宜以連爲君。而芩爲佐。清瘡之熱毒。宜以芩爲君。而連佐之。又如金銀花。花開黃白。藤名忍冬。能啟陰氣而解氣分血分之熱毒。蓋黃走血而白走氣也。故解痘毒者。宜之。而瘡毒亦可。若夫白花地丁。又專于瘡證者也。此用藥之大開目。學者引伸觸類。微妙無窮。

胎前論

易繫曰。男女媾精。萬物化生。是五類昆蟲。咸感陰陽。

精氣而成孕育。腎主藏精，爲生氣之原，故胎之根本在腎。假血以成形，衝任之血，肝所主也。故始于肝藏。至養肝氣暴虛，故多思酸，作嘔。夫人生于寅，故始于厥陰木。藏府之精氣，次序資養，至十月而五行之陰陽已周。十干之氣已化，歸于壬癸而生。戊癸化火，此丁壬化木。此天地生成之道也。一月肝木，二月膽木，三月君火，四月相火，五月脾土，六月胃土，七月肺金，八月大腸金，九月腎水，十月壬水。藏府陰陽之氣，循序相生，如主養之氣不足，則胎亦不長矣。胎長如瓜，若不長，則有墮落之虞。金匱要略云：懷身七月，太陽當養不養，此心氣實，當刺瀉。

勞宮蓋因火制其金也。故如土氣主養。當培其土而抑其木。金氣主養。當瀉其火而資其金。以逐月主養之藏府。審其虛實而調之。此養胎之大要也。又火能速物。是以三月四月多有半產之虞。火能尅金。故七月亦有不足之慮。如胎氣熱者。當預防之。胎以腎爲本。故養胎以地黃。杜仲爲君。坤德厚而資生萬物。故白朮大棗爲安胎之聖藥。胎從血長。是以四物湯乃胎產之要方。胎寄而生。故桑上寄生。川續斷力能繫胞。火能速物。故芩連益母皆爲要藥。氣化則血行而胎長。故砂仁橘皮紫蘇枳殼宜兼用以疎氣。夫天地

交而萬物生。水火濟而陰陽平。是以阿膠艾葉香附  
茯苓得交感之妙用者也。至于胎前百病。以治病養  
胎之法。兼而行之。此胎前之大綱領也。婦人小兒總  
止多胎產痘疹耳。其餘百病皆歸一法。是以  
靈素諸經。不過分別數條。學者當明白此理。  
開之曰。肺屬天。七月而生者。得乾金之氣。故能育而  
且壽。九月感天癸之氣。十月得化運之全。若八月則  
不育矣。

### 產後論

產後氣血兩虧。宜于溫補。但初產者。惡血未行。先宜  
導滯。以防上。下新產婦人。喜中風。產後土虛。能停食。

產後燥結多血阻。此三者是爲實證。宜于清補相兼。如無此三證。氣虛者補氣。血虛者補血。寒者溫之。熱者涼之。隨其所利而行之。此產後之大法也。予嘗用大劑人參。薑附救產後虛脫之危。證用芍藥以利熱。燥之留停。又何嘗忌人參之補。薑附之熱。而芍藥亦未嘗酸斂也。

、急下論

陽明篇曰。傷寒六七日。目中不了了。睛不和。無表裏證。大便難。身微熱者。此爲實也。急下之。宜大承氣湯。陽明病。發熱汗多者。急下之。宜大承氣湯。發汗不解。

腹滿痛者急下之宜大承氣湯少陰篇曰少陰病得之二三日口燥咽乾者急下之宜大承氣湯少陰病自利清水色純青心下必痛口乾燥者急下之宜大承氣湯少陰病六七日腹脹不大便者急下之宜大承氣湯夫寒傷六經止陽明少陰之有急下證者蓋陽明秉悍熱之氣少陰有君火之化在陽明而燥熱太甚緩則陰氣絕矣在少陰而火氣猛烈勿戢將自焚矣非腸胃之實滿也若實在腸胃者雖十日不更衣無所苦也如此六證若究省不到不敢急下故病此者鮮有能生之且予嘗聞之曰痞滿燥實堅五證

皆備。然後可下。噫。當急下者。全不在此五字。

急溫論

少陰篇曰。少陰病。脈沉者。急溫之。宜四逆湯。太陽篇曰。病發熱。頭疼。脈反沉。身體疼痛。當救其裏。宜四逆湯。夫急溫急救之。在少陰。太陽者。有水火寒熱之氣化也。病在少陰。感君火之甚者。急下之。病陰寒之劇者。急溫之。寒傷太陽。欲如連樞。神氣乃浮。脈反沉者。陽反內陷也。故當救其裏。二者止見脈沉。若待其厥冷。脈絕。則不救矣。故所謂急者。如人墮于水火之中。緩卽焚溺矣。



# 汗下論

一薰一蕕十年遺臭。故去邪莫如速也。曰汗多亡陽。如表邪盛者。汗之而解。以養陽也。曰下多亡陰。如裏邪實者。下之而解。以養陰也。多者。謂其太過也。太過不可。而況妄行乎。靈樞經曰。上焦開發。宣五穀味。熏膚充身澤毛。若霧露之溉。是謂氣。蓋氣化而汗出。溱溱也。又曰。奪血者無汗。是血氣不足。邪不得從汗解也。傷寒論曰。微則陽氣不足。濇則無血。下之則心下痞。鞭是血氣不足。又難從下解也。當知邪賊宜攻。而正氣又當培養。夫邪正相持。則爲寒熱出入。邪負則

愈正北則危。汗下之法猶援兵也。善用兵者寡可以敵衆。弱足以勝強。若不審虛實。不識形勢而妄攻之。反爲賊害矣。

往來寒熱論

辨脉篇曰。病有灑淅惡寒而復發熱者。何。荅曰。陰脉不足。陽往從之。陽脉不足。陰往乘之。曰。何謂陽不足。荅曰。假令寸口脉微。名曰陽不足。陰氣上入陽中。則灑淅惡寒也。曰。何謂陰不足。荅曰。尺脉弱。名曰陰不足。陽氣下陷入陰中。則發熱也。陽脉浮。陰脉弱者。則血虛。血虛則筋急也。其脉沉者。榮氣微也。其脉浮而

汗出如流珠者衛氣衰也。榮氣微者加燒針則血流  
不行。更發熱而躁煩也。夫藏脉爲陰。府脉爲陽。血爲  
陰。氣爲陽。榮爲陰。衛爲陽。內爲陰。外爲陽。此所言陰  
陽者。非此之謂也。乃陰陽之氣耳。陰陽之氣者。先天  
之水。火也。在地爲水。在天爲寒。在地爲火。在天爲熱。  
無形之氣。曰陰。曰陽。有形之徵。曰水。曰火。陰陽氣交  
是爲平人。乘于脉中。則爲往來寒熱矣。故始曰陰脉。  
曰陽脉。復曰寸口。曰尺脉。曰陰氣。曰陽氣。曰陰中。曰  
陽中。謂陰陽之氣相乘入于脉中而見于寸尺也。蓋  
以寸尺分陰陽。非藏脉爲陰脉。府脉爲陽脉也。又非

謂內絡于藏府者爲陰脉。外絡于形身者爲陽脉也。  
中脉中也。陰中陽中者。謂身半以上爲陽。身半以下  
爲陰。故曰上入下陷也。此陰陽之氣。乘于脉中而爲  
寒爲熱。非脉中之血虛。故曰陽脉浮。陰脉弱者。則爲  
血虛也。血虛則筋急者。謂血行脉中。滲于脉外。肝藏  
所主。而血自有陰陽之分也。脉內爲陰榮氣微者。其  
脉沉。衛氣衰者。其脉浮。謂陰陽相乘者。見寸口脉微。  
尺中脉弱。非榮衛之爲陰陽。而脉之浮沉也。如燒鍼  
則血流不行者。謂血隨榮轉。非隨陰陽之氣而往來  
也。更發熱而躁煩者。謂榮氣之生于陽明。而主于心

腎也。燒鍼之火氣傷陽明則發熱傷心腎則躁煩。此言榮血生于後天水穀之精陰陽本于先天水火之氣。乃陰陽之氣乘于脉中而爲寒爲熱。非榮血之爲寒熱也。男玉師曰。何以治之。曰。金匱腎氣丸爲主方。配四物以養血。

### 潮熱論

胃爲水穀之海而外合海水。是胃氣晝夜升降如潮往來。但平人有潮而不爲熱也。如有邪病留于脉肉筋骨間。隨潮而出則爲發熱。故當審其先發于何部何處。獨盛分六經而治之。與夜熱之不同也。夜熱本

于陰虛潮熱。因于病氣。潮熱一潮而退。夜熱至旦方涼。因證不同。治法亦異。

傷寒潮熱列于陽明篇中

### 傷寒論編次辯

仲祖傷寒論。其中條緒井井。原係本文。非叔和所能編次。蓋謂斷簡殘篇者。是因訛傳訛也。如瘧濕暍三種。非傷寒之病。因病在太陽而與傷寒相似。故先提出于太陽篇外。溫病風溫。原因傷寒所致。然非卒病之風寒。故先分別于太陽篇中。太陽爲諸陽主氣。故首提太陽之爲病。次中風。

風卽寒中鼓動之氣。故篇名傷寒論。而反先提中風。

次傷寒。次傳經。次桂枝湯證。次麻黃湯證。如六經篇。

首則曰某經之爲病若六經所繫論者總歸于太陽之首篇其間條分縷析有斷有續予于斷續間首加一圈如學庸孔孟之分章便後學之體認此皆仲祖位置非叔和編次也

再按仲祖一百十三方爲形層淺深陰陽寒熱而設無分風與寒也如邪在皮毛者宜麻黃湯在肌腠者宜桂枝湯故曰桂枝本爲解肌然中風之用桂枝者始受之風邪不閉于皮毛而入于肌腠故桂枝湯爲中風之首方如寒邪發汗不解而入于肌腠者亦屬桂枝湯證故邪病太陽而無分風與寒者則曰太陽

病有風寒之分者。則曰太陽中風。曰中風發熱。曰傷寒。如風寒之邪。皆可爲柴胡湯證者。則曰傷寒五六日中風。皆可爲陷胸湯證者。則曰浮則爲風。曰傷寒五六日結胸熱實。如瓜蒂散證。則曰傷寒中風。蓋始受之時。有風寒之分者。分中風傷寒。如病在太陽。感受太陽之熱化者。則曰太陽病。病在陽明。感陽明之燥化者。則曰陽明病。而無分風與寒矣。至如大小青龍湯證。乃病太陽寒水之氣者也。太陽之上。寒氣主之。故太陽標陽而本寒。大青龍證。太陽標本之爲病也。小青龍證。病太陽之陽而動其水氣也。曰太陽中風。



謂風中太陽之氣也。脈浮緊者，浮則爲風，緊則爲寒。乃天之風邪與太陽之寒氣相搏而見于脈也。發熱者，風在太陽而爲熱也。惡寒者，病太陽之寒氣也。身疼痛者，風寒之邪尚及于形身，不汗出者，邪正之氣陷于內也。煩躁者，太陽標本之氣化也。此風中太陽之熱邪而兼病其本寒，故用麻黃桂枝之複方。去芍藥之苦，平易石膏之甘辛，直從內而透發于外也。如汗出惡風者，風邪在外，故不可服。蓋汗之生，原有一出于表者，血液之汗也；一出于裏者，陽明水穀之汗也。麻黃湯發表汗之劑也。桂枝湯解肌腠之邪也。

如麻黃配石膏乃直從裏而發陽明水液之汗矣邪

不在裏而妄動其陽明是以筋惕肉瞤陽明主肌而

主宗筋也又如傷寒脉浮緩者乃寒傷太陽而邪正

之氣並陷于內也夫天之寒邪與太陽之陽氣相搏

于膚表之間其脉則緊風與寒搏寒與陽搏乃此寒

傷太陽寒已化熱邪正相合而陷于內故止見虛浮

之緩脉也身不疼者邪在內也但重者陽氣陷也乍

有輕時者正氣欲出也太陽與少陰標本相合如寒

傷太陽而見少陰證者則爲一身手足盡熱以熱在

膀胱必便血也蓋太陽與少陰有標本寒熱之合化

寒在太陽則病反其本而爲熱矣。及于裏陰則同氣相感于少陰之火氣矣。故曰無少陰證者大青龍湯發之。上章乃風動之邪入于裏而尚涉于形身故見浮緊之脉。疼痛之證宜大青龍湯主之。此乃寒凝之氣入于裏而無形身之痛故恐轉屬于少陰。藉陽氣之欲出乍有輕時而以大青龍湯發之。此風寒之邪病太陽之標陽而兼動其本氣者也。又傷寒表不解心下有水氣者病太陽之陽而動膀胱之水氣也。乾嘔者水氣上逆也。水火相交者正氣也。水氣上乘者邪氣也。發熱者寒在太陽而爲熱也。欬者水氣上通于肺也。病表陽之氣

而動其水氣。則氣不化而水不行。故有或渴或利。或噎。或小便不利。少腹滿。或喘之證也。宜小青龍湯主之。用麻黃桂枝甘草芍藥以清肌表之邪。用乾薑半夏細辛以助火土之氣。用五味子之酸助春生之木氣。以洩冬令之寒水也。渴者火鬱于上。水逆于下。故去半夏之燥。加栝蒌根通水液以上滋利者。寒水在下。火氣不能下交。薤花性寒屬水。用花萼之在上者。如雞子大。熬令赤色。皆取其象心導火氣溫熅于下也。水得寒氣冷必相搏。其人卽噎。故加附子以散寒。小便不利少腹滿者。土受所勝之侮而不能制化。故

加茯苓補中土以伐水邪喘者加杏子以利肺氣此在表之邪入于裏而動其水氣故並去其麻黃又傷寒心下有水氣欬而微喘發汗不得服湯已渴者此寒去欲解也小青龍湯主之此表邪已解而寒水之氣上逆也欬而微喘者水氣上乘于肺也發熱不得者得太陽之氣化也服湯已渴者水寒之氣外散而復傷太陽之氣也故仍以小青龍主之經曰太陽之上寒氣主之在天呈象在地成形在天爲寒在地爲水天有六氣地有五行人秉天地之氣而生兼有此五行六氣是以大青龍證病太陽之陽而動其寒氣

者也。故宜大青龍湯以發汗。謂在天之龍能行雲而施雨也。小青龍證。太陽之陽而動其水氣者也。故宜小青龍主之。謂潛藏始蟄之龍能洩冬令之寒水也。又如少陰病。真武湯主之者。病少陰而動其水氣也。四逆散主之者。病在少陰得君火之熱化而動其水氣也。蓋太陽少陰乃水藏。水府皆有寒熱之氣化者也。若夫外因之水停飲于中焦者。又屬五苓散證。蓋其因有不同而治法亦別。是以有發表之方。有解肌之方。有散寒之方。有行水之方。有氣分之方。有血脈之方。有胸脇之方。有腹胃之方。有却邪之方。有補

正之方有大涼之方有大熱之方有大補之方有大瀉之方有和解之方有寒熱補瀉兼用之方皆從形層外內之淺深寒熱虛實之氣化

麻黃桂枝分形層大小青龍論氣化

不然止屬風寒二邪奚有三百八十九證之分耶明乎形層氣化之道傷寒大義思過半矣

### 風傷衛寒傷榮辨

風乃天之陽邪傷人衛氣寒乃陰邪傷人榮血同氣相感耳辨脉篇所謂風傷衛寒傷榮者謂風寒兩感榮衛俱傷風則傷衛寒則傷榮以言其大槩若夫天之風寒傷人氣血或中于陰或中于陽無有恒常者

也。人之皮毛肌腠氣分爲陽。血脉爲陰。榮行脉中。衛行脉外。風雨寒暑之中人也。始于皮膚。皮膚緩則腠理開。開則邪從毛髮入。入則抵深。深則毛髮立。毛髮立則淅然。故皮膚痛留而不去。則傳舍于絡脉。是風寒之邪皆始傷皮毛之氣。分留而不去。而後傳舍于經榮者也。靈樞經曰。寒傷形乃病。形風傷經。脉經脉乃應。金匱真言曰。八風發邪以爲經。風觸五藏邪氣發病。是又寒傷氣而風傷榮矣。蓋陰陽之道變化不測。故內經自有矛盾之文。以意逆志。庶爲得之。若膠執文辭。又不可與論陰陽矣。至于傷寒論之中風。更



爲不同。非春傷之風。亦非四時所中之風。卽嚴寒鼓動之氣。故中風首節曰。膏肓惡寒。淅淅惡風。寒乃陰凝之邪。閉于皮毛之間。故用麻黃湯以發散。風乃鼓動之氣。開發皮毛。入于肌腠。故宜桂枝湯以解肌。是又寒在皮毛。而傷氣。風入腠理。而將傷于榮矣。太陽之氣。主于皮毛之間。寒傷太陽。是以六氣相傳。七日來復。若入于經。榮則爲桃仁承氣。抵當湯之血證。不復再傳。陽明矣。寒傷氣。故曰傷寒。一日太陽受之。脉若靜者。爲不傳。頗欲吐。若躁煩。脉數急者。爲傳也。又曰傷寒二三日。陽明少陽證不見者。爲不傳也。此寒

在太陽之表。故有六氣之相傳。風入于肌腠。故不爲傳經之邪也。至于春傷之風。四時所中之風。或傷于皮毛。則爲嚏淚喘欬。入于肌腠。則爲肌膚不仁。傷于筋骨。則爲痛痺拘攣。入于脉中。或爲鼠瘻。或爲厲瘍。久風入中。則爲腸風飧泄。或中于府。卽不識人。或中于藏。舌卽難言。口吐涎。此在靈素金匱諸經中求之。與傷寒論之中風不相同也。

### 醫學入門

金匱要略曰。千般疢難。不越三條。

疾丑刃切音趁

一者經絡

受邪入藏府爲內所因也。二者四肢九竅血脉相搏。

壅塞不通。爲外皮膚所中也。三者房室金刃蟲獸所

傷。以此詳之。病由都盡。

金匱二條皆重外因。以房室服食爲內因。

宋成無

已曰。病有三因。一者外因于天。二者內因于人。三者

不內外因。外因于天者。風寒暑溼之六淫也。內因于

人者。喜怒憂恐之七情及飲食房勞也。不內外因者。

金刃跌撲蟲獸笞杖之所傷也。人之百病不外此三

者。夫傷寒外因也。而傷寒經旨。風寒暑溼之六氣咸

所具載矣。其間分析表裏陰陽寒熱氣血邪正虛實。

內外百病不

出此十二字

靡不備悉。明乎傷寒之道。千般病難不

出于範圍焉。故醫學入門。當從傷寒始。先難其所難。

而後易其所易。蓋外因之病暴而危。內因之病徐而

持。

中風癰痢痿痺疝厥頭腹諸痛多係外因

故治外感者可以活人。可以

死人。治內傷者。或少有失悞。未卽爲害。是以能醫內傷而不諳治傷寒者。未可醫名也。能醫傷寒而不諳治內傷者。未之有也。

醫以力學爲先

月三六九晨集及門說內經及傷寒論講畢。謂諸生曰。時俗相沿云。行醫全憑時運。予以爲不然。諸生來學。當苦志讀書。細心參究。庶可免庸醫之責。若憑時運。則何業不可爲。而習此苦難之事。設使殺一不辜。

而救百人其功不能贖罪。蓋救人乃醫家分內事。況多有病之輕者。有病之自能愈者。或病雖劇而可救者。越人曰。僕不能生人耳。不起之病。僕能起之。是非必死之病。而醫能活之。若使病者不死于病。而反死于醫。又何異于挺刃。是以救人之功。小悞傷之罪大。試觀栽杏。幾尚悞投藥。餌傷及母子二命。况平人乎。然此亦警世之事也。古今名流。皆生前根氣豐厚。若再加培植。即可名登仙籍。惜乎不能何也。旣已名擅當時。焉肯虛心下士。况一人之精神有限。或忙中有錯。卽悞用其藥。亦不自知其非。病家延請。惟艱。幸而

至之焉。敢論其是非。卽服藥有悞。反歸于死者之命。是以運之小者其過小。運之大者其過大。諸生能鑑予言。潛心好學。將來運之小者可大。運之大者可無過矣。開之曰。歷觀古今醫家有子孫顯達者。有子孫式微者。大有霄壤之分。若不圖名。不貪利。虛衷受益。存心活人。有不永昌厥後者乎。

又曰。古稱醫士爲山中宰相。謂能變理陰陽。調和氣味。操生殺之柄耳。記云。醫不三代。不服其藥。許學士曰。謂能讀三代之書。予以爲世代相傳。又能讀書好學。猶簪纓世胄。士之子而恒爲士也。若僅守遺方。以

爲世傳何異按圖索驥。夫天有四時之氣。地有五方之異。人之百病。變幻多端。卽如傷寒一證。有三百八十九法。可膠執遺方。能通變時疾乎。趙括徒讀父書。尚至喪師敗績。况無遺書可讀耶。守祖父之業而不好學者。可方草廬諸葛乎。伊川先生曰。醫不讀書。縱成倉扁。終爲技術之流。非士君子也。盧不遠先生曰。當三復斯語。及門者多係世醫子弟。故復言此以戒之。

### 中庸之道

中者不偏。庸者不易。醫者以中庸之道存乎衷。則虛者補。實者瀉。寒者溫。熱者涼。自有一定之至理。若偏

于溫補偏于涼瀉。是非中非庸矣。夫醫道上通天之  
四時六氣。地之五方五行。寒熱溫涼。升降浮沉。信手  
拈來。頭頭是道。急者急治。緩者緩治。若僅守平和之  
橘皮湯者。又執中無權也。遡觀古今。多有偏心偏于  
溫補者。惟用溫補。偏于清涼者。慣用清涼。使病人之  
宜于溫補者。遇溫補則生。宜于涼瀉者。遇清涼則愈。  
是病者之僥倖。以就醫。非醫之因證以治病也。豈可  
語于不偏不易之至道哉。

雜證論

雜證者。謂一人之病。見證龐雜。當知始受之因。則一。



久久不去漸至蔓延故治雜病如理亂繩得其頭緒一路理清不則愈理愈亂矣所治之藥亦專取其要多則雜雜無功經曰一者因得之又曰治之在于一嗟乎精一之道難矣人秉天地之氣所生此身中有上下陰陽之氣交五運六氣之變化榮衛血氣之貫通五藏六府之生始知其推數無窮而後可歸于一非細參靈素諸經不易得也

### 十干化五行論

黃帝問曰五運之數土主甲己金主乙庚水主丙辛木主丁壬火主戊癸願問其所始也岐伯曰昭乎哉

問也。臣覽太始天元冊文。丹天之氣經于牛女戊分。  
齡天之氣經于心尾已分。齡音金蒼天之氣經于危室  
柳鬼。素天之氣經于亢氏昂畢。苍天音之氣經于張翼  
婁胃。所謂戊己分者。奎壁角軫。則天地之門戶也。夫  
候之所始。道之所生。不可不通也。此岐伯論五行之  
化。始于五方之天象。丹赤色。火之氣也。牛女在癸度。  
經于牛女戊分。戊癸合而化火也。齡黃色。土之氣也。  
心尾在甲度。經于心尾已分。甲己合而化土也。蒼青  
色。木之氣也。危室在壬度。柳鬼在丁度。丁壬合而化  
木也。素白色。金之氣也。亢氏在乙度。昂畢在庚度。乙

庚合而化金也。玄黑色。水之氣也。張翼在丙度。翼

在辛度。丙辛合而化水也。夫丹齡蒼素玄。天之五氣

也。

丹齡蒼素玄。天之五色也。青黃赤白黑。地之五色也。在天之五色。化生地之五色。

金木水

火土。地之五行也。天之十干。經于五方之分。陰陽配

合而化生五氣。天之五氣。化生地之五行。所謂在天

成象。在地成形。五行之中有二火。在地爲木。在天爲

風。在地爲火。在天爲熱。在地爲土。在天爲濕。在地爲

金。在天爲燥。在地爲水。在天爲寒。在地爲火。在天爲

暑。是地之五行。化生天之六氣。此天地之陰陽交相

生化者也。故曰寒暑燥濕風火。天之陰陽也。三陰三

陽上奉之。木火土金水。火地之陰陽也。生長化收藏。不應之。三陰三陽者。子午爲少陰君火。丑未爲太陰濕土。寅申爲少陽相火。卯酉爲陽明燥金。辰戌爲太陽寒水。己亥爲厥陰風木。是天之十干化生地之五行。地之十二支上承天之六氣。後人不參究上古聖經。不明天地陰陽之化運。有以逢辰則化之說者。有以制尅則化之說者。此皆技術家之迂論也。

侶山堂類辯卷下

西陵隱菴道人撰

錢塘楊元如叅訂

○本草綱領論

天地所生萬物皆感五運六氣之化故不出五氣五味五色五行寒熱溫涼升降浮沉之別經云五味陰陽之用辛甘發散爲陽酸苦湧洩爲陰淡味滲洩爲陽鹹味湧洩爲陰六者或收或散或緩或急或燥或潤或熨或堅隨所利而行之此物性之綱領也五氣五味各歸所喜酸先入肝苦先入心甘先入脾辛先

入肺鹹先入腎肝色青宜食甘心色赤宜食酸肺色  
白宜食苦脾色黃宜食鹹腎色黑宜食辛辛散酸收  
甘緩苦堅鹹熉毒藥攻邪五穀爲養五果爲助五畜  
爲益五菜爲充氣味合而服之以補益精氣四時五  
藏之病隨五味所宜也又肝苦急急食甘以緩之欲  
散急食辛以散之用辛補之酸瀉之心苦緩急食酸  
以收之欲熉急食鹹以熉之用鹹補之甘瀉之脾苦  
溼急食苦以燥之欲緩急食甘以緩之用苦瀉之甘  
補之肺苦氣上逆急食苦以泄之欲收急食酸以收  
之用酸補之辛瀉之腎苦燥急食辛以潤之

辛又能  
潤爲能

開發腠理致津液通氣也欲堅急食苦以堅之用苦補之鹹瀉之

又辛走氣氣病無多食辛鹹走血血病無多食鹹苦

走骨骨病無多食苦靈樞經走骨甘走肉肉病無多食

甘酸走筋筋病無多食酸此五味補瀉宜忌之綱領

也夫百病之生也不出乎表裏陰陽寒熱虛實虛者

補之實者瀉之寒者熱之熱者寒之堅者削之客者

除之勞者溫之凡甘溫辛結者散之留者攻之燥者

濡之急者緩之散者收之損者溫之逸者行之盛者

折之驚者平之高者抑之下者舉之微者逆之甚者

從之上之下之摩之浴之薄之劫之開之發之適事

爲故逆者正治從者反治此治病之綱領也萬物各有自然之性凡病自有當然之理卽物以窮其性卽病以求其理得其性理豁然貫通則天地所生之萬物人生所患之百病皆歸一致矣用之可十可百推之可萬可千豈不綽然有餘裕哉

藥性形名論

按本草綱目金石草木禽獸果穀自神農及今計一千六百餘種命名之義各有思存如黃連白芷青黛玄參之類以色而命名也甘草苦參酸棗細辛之類以味而命名也寒水石溫胸臍火硝香薷之類以氣



而命名也。桑皮、橘核、杏仁、蘇子之類，以體而命名也。夏枯草、款冬花、長春、秋葵之類，因時而命名也。防風、續斷、決明、益智之類，以功能而命名也。釣藤、兜鈴、狗脊、烏頭之類，以形象而命名也。命名之義，不能枚舉。施于治道，各有功用。如五氣分走五藏，五味逆治五行，皮以治皮，節以治骨，核以治丸。松節、杉節及草根之類，治畢九之多，堅節者皆能子能明目。藤蔓者治筋脉，血肉者補血肉，各從其類也。如水草、石草，其性主升，稍秒子實，其性主降。甘香之品，能橫達于四旁；寒熱之氣，性浮沉于上下。在土之根莖，本乎上者親上，本乎下者親

下在外之枝幹在根者治本在枝者行于四支此物性之自然也又如夏枯之草夏收之木半夏之生麩麥之成皆得火土之氣而能化土秋英之菊秋鳴之蟬感金氣而能制風凌冬不凋者得寒水之氣而能清熱先春而發者乘甲木之性而能生升此感天地四時之氣而各有制化也甘溫者補苦寒者瀉色赤者走血色白者走氣赤圓者象心白辨者象肺紫尺者益脾香圓者入胃徑直青赤者走肝雙仁圓小者補腎以形色之相類也

以象形而治五藏詳金匱要畧

陽者主上陰

者主下陰中之陽升陽中之陰降輕清者主上重濁

者主下。濁中之清升。清中之濁降。凡物感陰陽之氣而生。各有清濁升降之質性者也。又如山梔炒黑而降。黑豆黃卷而升。紅麴生血。神麴化疴。此假造釀而得化功者也。因名而取實。因象以用形。得其性之升降。浮沉。氣之溫涼。寒熱。色之青黃。赤白。味之甘苦酸辛。一千六百餘種。大概不越乎此矣。

### 草木不凋論

草木寒不黃。隕及花發于冬者。得冬令寒水之資也。木生于水。水通于天。水火相濟。水由地行。水氣之通于四藏者也。如麥門冬。欵冬。花枇杷。葉側柏。葉山豆。

根巴戟天之類。腎之肺藥也。黃連、菖蒲、山梔、南燭、茶花、梅花之類。腎之心藥也。厚朴、豆蔻、丁香、枳橘之類。腎之脾藥也。茵陳、萳竹、密蒙花、女貞實之類。腎之肝藥也。夫腎爲水臟，受藏五臟之精，而復還出于四臟。入肝爲淚，入心爲血，入脾爲涎，入肺爲涕，上下交通，而外注于九竅。是以得寒水之草木，能啟陰氣，上滋四臟，復能導四臟之氣而下交于陰。又匪獨腎氣之通于四臟，五臟之氣皆相貫通，而藥性亦然。如棗仁、脾之心藥也。石斛、脾之腎藥也。芍藥、脾之肝藥也。桑皮、脾之肺藥也。類而推之，總不出五行之生化。

## 四氣逆從論

經云。升降浮沉則順之。寒熱溫涼則逆之。謂春宜用升。以助生氣。夏宜用浮。以助長氣。秋時宜降。以順收令。冬時宜沉。以順封藏。此藥性之宜順四時者也。春氣溫。宜用涼。夏氣熱。宜用寒。秋氣涼。宜用溫。冬氣寒。宜用熱。此用氣之宜逆四時者也。而病亦如之。然時氣病氣。又皆有常有變。知其常變。反其逆從。可以把握陰陽。裁成造化矣。

## 大棗

棗色黃味甘。脾家果也。夫木末之實而爲心家果者。

生化之道也。木末之實而爲脾家果者。制化之道也。蓋天地所生之萬物。咸感五運六氣之生化。明乎陰陽生剋之理。則凡物之性。可用之而生化于五藏六府矣。○元如曰。桃爲肺之果。核主利肝血。杏爲心之果。核主利肺氣。亦制化之理。然與。

梔子

梔子冬不隕葉。五月感一陰之氣。生花六出。潔白芬香。得金水之氣也。其實結于枝稍圓小。赤色味苦性寒。乃陰中之陽腎之心品也。故炒黑而成離中之虛。導心火以下交于腎。○元如曰。六者陰之終也。花多。

五瓣如雪花。梔子花。玄精石。皆感陰氣生成。

### 枇杷

枇杷四季長青。葉上多毛。凡草木之生毛者。皆主治肺多刺者。花開于秋者。皆得堅金之氣。而能制風。枇杷初秋結實。深秋放花。夏時果熟。又得冬令之氣。能引寒水以上滋。利肺氣以下降。故主治欬嗽卒啞。并下氣消痰。

### 欬冬花

欬冬花氣味辛溫。生于閩中及雍州山谷溪水間。冬時發條結葇于冰雪中。故名欬冬。

西北氣寒冰雪至夏不消。欬冬辛溫。

可爲大土人謂之看燈花。又曰敲冰取欸冬。謂在正  
熱者矣。月前半月採之。如過元宵燈節。花卽大放矣。此陰中  
之陽升也。如形寒飲冷。肺氣虛寒。作喘者。宜之。若陰  
火上炎。肺葉焦滿。恐益銷燬。毀傷矣。

### 澤瀉

澤瀉。水瀉也。凡水草石草。皆屬腎。其性主升。蓋天氣  
下降。地水之氣上升。自然之理也。凡物之本乎上者。  
性升。本乎下者。性降。澤瀉形圓。無下行之性矣。春時  
發生。萌于水中。猶莖直上。秋時白花作叢。腎之肺品。  
也。易曰。山澤通氣。能行在下之水。隨澤氣而上升。復



使在上之水隨氣通調而下瀉故名曰澤瀉。○元如曰如何首烏形圓莖蔓其性惟升牛膝形絢而長其性惟下故主治在下諸品可類惟之。

### 芍藥

芍藥氣味苦平苦走血故爲血分之藥苦下洩故本經主邪氣腹痛除血痺破堅積寒熱因其破洩故太陰篇云太陰爲病脈弱其人續自便利設當行大黃芍藥者宜減之以其人胃氣弱易動故也今人咸云芍藥主酸斂而不知有大黃之功能。○元如曰芍藥乃神農中品之藥本經曰氣味苦平後人增曰酸而

實未嘗酸也。

盧子由曰市肆一種赤芍藥不知為何物草根兒醫瘍醫多用之此習已而不

察其為害殊甚

牡丹皮

牡丹皮色赤氣味辛寒血分之藥也不緣子生故名

曰牡丹陰中之陽升也其味辛故主發散中風寒熱邪

氣除癥堅瘀血寒能涼血故主痺癰驚癇凡骨蒸勞

熱癰腫瘡瘍丹皮為要藥若吐血衄血大非所宜以

其上升故也○元如曰若因風寒而衄血者宜之如

陰火上炎者大忌

括樓

凡草木之根其性上升。稍秋子實性復下降。物之理也。括樓蔓延結實。則根粉盡消。實黃赤而子白。潤氣味苦寒。是以天花粉能啟陰液。以上滋于心肺。括樓實復能導心肺之氣以下行。故本經主治胸痺。○元如曰。如蘇子、蘿藦子、白芥、雲臺之類。性皆下行。所謂上行極而下也。

### 麥芽

麥春長夏成。得木火之氣。故爲肝之穀。透發其芽。能達水氣以制化脾土。故能消米穀之實。經云。食氣入胃。散精于肝。淫氣于筋。人之食飲不化。而成反胃咽。

膈者。多因肝氣鬱怒所致。予治此證。于調理脾胃藥中。倍加麥芽。多有應手。蓋醫者。但知消穀而不知疎肝。○玉師曰。可類推于穀芽。黍芽。大豆黃卷。

薯蕷

薯蕷。古名也。避唐宋帝諱。改名山藥。種植之法。切作

薄片。隨所杵之竅而長之。

盧子由先生治一血利久

矣。山藥隨所杵之竅而長。滿性能塞管。用山藥爲君。配血藥而愈。此乃意度之妙用。

又百合之

白花者。摘碎埋于土中。一辦卽生百辦。而成一蒲。夫

凡物切碎。皆成腐穢。二品所生之異。蓋得本體之精。感氣化而生長。山藥肉內多涎。仲景用百合湯。以水

浸一宿。出其白沫。涎沫乃其精也。氣生于精。二品得精氣之盛。故主補中益氣。長肉強陰。元如曰。凡物多精汁者。皆主養精補血益氣生肌。

### 枸杞

神農本草經總名枸杞。無地骨皮。枸杞子之分。蓋狗字諧狗。杞字諧已。狗屬戌。而戌主右腎。腎主骨。而已屬陰土。故有地骨之名。而久服能堅筋骨。氣味苦寒。能清熱中消渴。蓋能助水土之氣。上滋心肺者也。其子色赤。性寒。能補兩腎之精氣。骨之精爲瞳子。故助瞳子之光明。

紅花

紅花色赤多汁。生血行血之品也。陶隱居主治胎產血暈。惡血不盡絞痛。胎死腹中。金匱方紅蘭花酒。治婦人六十二種風。又能主治瘰癧。臨川先生曰。治風先治血。血行風自滅。蓋風乃陽邪。血爲陰液。此對待之法也。花棣莖葉。且多毛刺。具堅金之象。故能勝制風水。夫男女血氣相同。仲祖單治婦人六十二種風者。良有以也。蓋婦人有餘于氣。不足于血。所不足者。乃衝任之血。散于皮膚肌腠之間。充膚熱肉。生毫毛。男子上唇口而生髭鬚。女子月事以時下。故多不足。

也。花性上行。花開散蔓。主生皮膚間散血。能資婦人  
之不足。故主治婦人之風。蓋血虛則皮毛之腠理不  
密而易于受風也。此血主妊娠。故專治胎產惡血。靈  
樞經云。飲酒者衛氣先行皮膚。故用酒煎以助藥性。  
癰邪亦伏于募原之腠理間。故能引其外出。夫血有  
行于經脈中者。有散于皮膚外者。而所主之藥亦有  
不同。如當歸地黃茜草之類。主養脈內之血者也。紅  
蘭花王生脈外之血者也。川芎芍藥丹皮紅麴之類。  
又外內之兼劑也。學者能體認先聖用藥之深心思  
過半矣。

石膏

石膏氣味辛甘微寒。神農本經主中風寒熱心下逆氣驚喘口乾舌焦不能息腹中堅痛除邪鬼產乳金瘡仲景用麻黃配石膏能發陽明水液之汁白虎湯解陽明燥熱之渴又主風熱發斑是神農仲景皆用爲發散之品蓋氣味辛甘而體質疎鬆如肌理但其性沉重色白若金故直從陽明而達于外也後人咸謂清內熱而主降下乃不明經義物性故耳夫凡物有可升可降者配發散之藥則升配破洩之藥則降如厚朴之氣味苦溫本經主中風傷寒頭痛寒熱乃



發散之藥也。仲景承氣湯配枳實、大黃、芒硝爲急下之劑。經云酸苦湧泄爲陰。蓋酸苦之味能上湧而下洩也。同升藥則升，同降藥則降。立方配合乃醫家第一義，詎可忽諸。

### 女貞實

女貞子乃本經上品。氣味苦平，主補中、安五藏、養精神、除百病。久服肥健，輕身不老，強陰，健腰膝，變白髮，明目。卽蠟樹也。立夏前後取蠟蟲種子，裹置枝上半月後，其蟲化出，延緣枝上，造成白蠟，堅白如凝脂。猶蠶食桑而成絲，連綿溫煖，皆得樹質精華，是以桑根

白皮。主傷中。五勞六極羸瘦。崩中絕脉。補虛益氣。女  
貞。雌與冬青同名。其種實異。冬青名凍青。葉微圓。子  
赤色。蠱不造蠟爲別也。世俗混用凍青實二物。功用  
迥別。采擇者不可不辯。

### 蓮實

蓮子。本經上品。氣味甘平。主補中養神。益氣力。除百  
疾。久服輕身耐老。不飢延年。夫蓮莖色青。味澹。中通  
外直。具風木之象。花紅。房白。鬚黃。子老而黑。有五行  
相生之義。故能補五臟不足。五臟主藏精者也。腎爲  
水臟。受藏五臟之精。石蓮子色黑。味澹。故用之以固

精氣今市肆一種狀如土石味極苦澇不知爲何物  
盧子由先生曰食之令人腸結宜于建蓮子中揀帶  
殼而色黑者爲是

有云假石蓮子乃樹上所生卽苦珠子之類

### 桑上寄生

桑寄生生于近海州野及海外之境地暖不蠶桑無  
剪採之苦氣厚意濃兼之鳥食榕實糞落桑上乘氣  
而生榕乃易生之木枝葉下垂卽生根作本故其樹  
極大多生于海山中是以子附于桑則爲桑上寄生  
蓋感桑之精氣故其功力一本于桑若寄生他木上  
者不惟氣性不同且反生災害矣今市肆者乃柴枝

也。有一種色黃瑱脆狀如金釵石斛者。庶幾可用。寇宗奭曰。予從官南北。徧搜不可得。故非親採。難以別真偽。要知市賣者皆偽也。予故以依附桑上之藤葉如三角楓者。取之安胎甚效。蓋亦得桑之精氣者也。

### 紫草茸

按本草綱目。紫草發明下。李時珍曰。紫草氣味苦寒。如痘疹欲出未出。血熱毒盛。大便閉滯者。宜之。已出而紫黑便閉者。亦可用。若已出而紅活。及白陷大便利者。切宜忌之。直指方云。紫草治痘能導大便。使發出亦輕。活幼新書云。紫草性寒。小兒脾氣實者。猶可。

用脾氣虛者反能作瀉故古方惟用紫草茸取其初得陽氣以類觸類所以用發痘瘡今人不達此理一槩用之非矣夫所謂茸者卽初生之蒙茸非紫草之外另有茸也又有如麒麟竭者謂之紫草茸非也乃紫鈿耳酉陽雜俎云紫鈿樹出真臘波斯二國樹高盈丈枝葉鬱茂經冬不凋天有霧露及雨沾濡則枝條出鈿狀如糖霜纍纍紫赤破則鮮紅能出痘毒此物產于異域殊不易得近有市利之徒以僞物假充索價甚厚非徒無益而反害之不若用草之爲當也

### 枳實

考工記云橘逾淮而北爲枳。蓋橘得江南溫熱之氣。故氣味辛溫。能達中土之氣。通灌于四旁。枳乘江北寒涼之氣。性味苦寒。能去寒熱之邪。下洩。是一物而性不同。因天地之氣也。本經主大風。在皮膚中如麻豆苦痒者。能啟寒水之氣。以對待其陽邪。枳葉經冬不凋得寒水之氣。夫橘至成熟而後採摘。其氣充滿。故能橫徧于四體。枳乃初生之小者。其氣收斂。故專主下泄。若夫枳殼之苦洩。其性又能橫充。所以本經止云實而無殼。至宋開寶間。始有殼實之分。如病胸腹實而當下者。應用實而以殼代之。乃識見淺而無力量處。

# 橘皮

橘皮臭香。色黃。味甘而帶辛。甘香黃主土。辛主金。夫

胃土主脈絡。胃又屬陽明。其色白。脾土主肌肉。肺金主皮毛。

橘皮在內之白膜。如胃府所主之絡。脈皮內之白若

肌肉。皮外之宗眼如毛孔。是從中達外。由脈而絡絡

而肌。肌而皮也。橘皮能宣發陽明之汗。解胃氣之逆

呃。蓋能宣達胃氣。外出于皮毛。若夫皮膚之邪逆于

內。而爲喘急。膈上之痰。結于上。而爲欬嗽。欲消痰降

氣而從下解者。是又從肌而絡絡而脈。脈而胃也。是

邪正之氣欲出欲入。而用橘皮爲導引者。皆藉皮內

之白膜如去其膜白則斷截出入之道路故本經止曰橘皮而並無留白去白之分

麥門冬

經云人之所受氣者穀也穀之所注者胃也胃者水穀血氣之海也海之所行雲氣者天下也胃之所出血氣者經隧也經隧者五藏六府之大絡也是藏府受水穀之精氣由胃府之大絡通于藏府之經麥門冬主傷中傷飽胃絡脉絕以其根鬚從中而貫如絡脉之貫于募原之中是通胸絡之氣藉中心之貫通也麥冬經冬不凋能啟陰氣上滋于心脉故主心腹



結氣。咳嗽虛勞。腎脉上貫肝膈入肺中。從肺出絡心。是腎氣之上交于心肺。心肺之痰熱欲從下解者。又咸藉麥冬之心而導引于脉中也。蓋凡物之寒涼者其心必熱。熱者陰中之陽也。人但知去熱而不知用陽得其陽而後能通陰中之氣。

### 防已

經云水道不行則形氣消索。是水有隨氣而運行于膚表者。有水火上下之相濟者。如氣滯而水不行則爲水病。癰病矣。防已生于漢中者。破之紋作車輻莖蔓空通。主通氣行水。以防已土之制。故有防已之名。

金匱方治水病有防已黃芪湯防已茯苓湯治痰飲  
有木防已湯防已加茯苓硝湯孫思邈治小便閉  
澀有三物木防已湯葶氣運于上而水能就下也今  
相沿爲下部之藥緣前人創論于前後人隨文附會  
爾果曰防已如險健之人幸災樂禍首爲亂階若善  
用之亦可敵兇突險此瞑眩之藥也故聖人存而不  
廢如上焦氣分之病皆不可用乃下焦血分之藥耳  
噫如此議論不知從何處參出夫氣化而後水行防  
已乃行氣利水之品反云上焦氣分不可用神農本  
草分上中下三品以養生補益延年不老者爲上品

治病者次之。毒藥爲下。防已能運行去病。是運中有補。故本經列于中品之前。奚爲存而不廢。且氣味辛平無毒。奚爲瞑眩之藥。如此議論。不能枚舉。無裨治道。反疑惑後學。予觀今世惟盧子田先生學識淵博。惟宗聖經。獨不爲前人所愚。

### 附子

附子如芋子。附母生。故名附子。旁之小子曰側子。土人欲重其効。兩用木坯將側子敲平于上。然母子之體不相合。故須揀子之少者。又當估去小子。有一兩餘方可用。若連子而重一兩五六錢。更爲有力。近時

俗人咸謂乙兩外者爲天雄。不知天雄長三寸以上。旁不生子。故名曰雄。土人尤忌生此。以爲不利。卽禱之。謂其不能子母之相生也。今人多取重一兩者。若側子多而去其二三錢。則母身止重七八錢之川烏矣。此緣失于考究。故沿襲時俗之訛。又如附子之尖。乃下行之根。其性趨下。有欲治上而用其尖者。顛倒物性。尤爲可笑。

### 丹雄雞

羽蟲三百六十。乘火運而生。故飛翔于上下。雞在卦屬巽。冠羽皆丹。感木火之氣者也。在支屬酉。又得金

之制化。故鳴于寅酉二時。鳴則先鼓其翼。風之象也。  
鳴者。金之聲也。玉師曰。木擊金則鳴。其性好鬪。秉肅殺之氣也。  
故主女子崩中漏下。赤白。蓋崩中漏下。肝主之血也。  
夫凡物各有自然之性。得其物性。施于治道。若合符  
節。故舉一以推之。

### 黑豕

猪屬亥水之畜也。故氣味鹹平。豕性甚躁。玉師曰。故躁屬陰。證  
行不舉。足而惟奔。故無病之人。食之補腎。生精如感  
于風寒者。食之生痰發喘。以其善奔水氣于上也。按  
毛蟲三百六十。感木氣而生。而牛羊犬馬。又秉火土

之化。豕屬水而性寒。羽蟲感火氣之化。而生長于水中者。又居其半。鵝鴨鳧鶩之類。生長于水中。蓋五類之蟲。雖感五行之氣而生。而五行之中。有變有化。明乎變化之道。可與參天地之生物矣。

鱗類

鱗蟲三百六十。而龍爲之長。感水運而生。水者至陰也。陰極陽生。故戊癸合而化火。火生于水也。玉師曰。龍身有火。是以魚屬火。而有水火相濟之功。

蚌蛤

介蟲三百六十。皆具堅甲之象。感金氣而生。金生水。

也。外剛內柔。離之象也。故蚌蛤之肉皆主清涼在外之殼。又能燥濕。是一物而有水火寒熱之分焉。非惟蚌蛤之爲然也。如坎爲水。水生木。其于木也爲堅多心。是木皮之清涼者。其心則熱。又非惟木之爲然也。凡物之極寒者必有熱。極熱者必有寒。蓋物極則變。變則生化。○玉師曰。如麻黃大發汗。而根節又能止汗。西瓜大涼。而子性大熱。

### 血餘

腎藏精。其榮在髮。心主血。髮乃血之餘也。夫血乃所生之精汁。奉心神而化赤。故曰血者神氣也。本經髮

髮至五癰。關格不通。療小兒驚。大人癰。仍自還。神化  
謂血化之餘榮。仍自還于神化也。血脈流通。精神交  
感。則關格通而驚癰自解。是以痘方用血餘者。取其  
能導腎精中之毒氣。歸于心。神行于脈絡。而又能敗  
毒。

龜板鹿茸

李時珍曰。龜鹿皆靈而有壽。龜首常藏向腹。能通任  
脈。故取其甲以補心。補腎。補血。皆以養陰也。鹿鼻常  
反向尾。能通督脈。故取其角以補命。補精。補氣。皆以  
養陽也。乃物理之玄微。神工之能事。按任脈起于中



極之下。以上毛際循腹裏上開元至咽喉上頤循面  
督脈環遶一身循腰脊歷絡兩腎龜板治小兒顙不  
合。鹿茸主生齒不老。菴二品皆屬于腎。腎主骨也。任  
督二脈爲陰陽百脈之宗。又皆出于腎。故痘方用之  
者。一取其養陰而清熱。一取其透頂以敗毒導腎中  
之火毒從百脈而外出于皮膚。龜板又能達于四肢  
故主治四肢重弱。  
上古卜蔡烹而用之。若敗龜板者乃病死枯敗之物絕無靈氣。又何所取焉。

### 半夏天花粉

月令五月半夏生。當夏之半也。其形圓。其色白。其味  
辛。陽明胃府之藥也。陽明秉秋金之燥氣。半夏啟一

陰之氣上與戊土相合戊癸合而化火故陽明爲燥  
熱之府能化水穀之精微天花粉別名瑞雪根粉潔  
白氣味苦寒莖引藤蔓能啟陰液從脉絡而上滋于  
秋金走經脉故有天花瑞雪之名蓋水陰之氣上凝  
于天而爲雪花者天雨之六花也一起陰氣于脉  
外上與陽明相合而成火土之燥一起陰液于脉中  
天癸相合而能滋潤其燥金是以傷寒金匱諸方用  
半夏以助陽明之氣渴者燥熱太過卽去半夏易花  
粉以滋之先聖賢立方加減豈輕忽歟

百合紫蘇

庭前植百合紫蘇各數莖。見百合花。晝開夜合。紫蘇葉朝挺暮垂。因悟草木之性感天地陰陽之氣而爲開闔者也。如春生夏長秋成冬殞。四時之開闔也。晝開夜合。朝出暮入。一日之開闔也。是以一歲之中有四時。一日之中有四時。而人物應之。百合色白氣平。其形象肺。能助呼吸之開闔。故主邪氣腹脹心痛。蓋氣行則邪散而脹痛解矣。主利大小便者。氣化則出也。主補中益氣者。氣之發原于中也。蘇色紫赤。枝莖空通。其氣朝出暮入。有如經脈之氣。晝行于陽。夜行于陰。是以蘇葉能發表汗者。血液之汗也。白走氣分赤走血分

枝莖能通血脉。故易思蘭先生常用蘇莖通十二經之關竅。消咽膈飽悶。通大小便。止下利赤白。予亦常用香蘇細莖。不切斷。治反胃膈食吐血。下血多。奏奇功。蓋食氣入胃。散精于肝。濁氣歸心。肝主血而心主脉。血脉疎通。則食飲自化。經云陽絡傷則吐血。陰絡傷則下血。通其絡脉。使血有所歸。則吐下自止。夫茜草歸芎之類。皆能引血歸經。然不若紫蘇。晝出夜入之行。速耳。於戲陰陽開闔。天地之道也。進乎技矣。

羌活防風

按神農本草三百六十種。以上品一百二十種爲君。

中品一百二十種爲臣。下品一百二十種爲使。羌活防風皆本經上品。有謂羌活治一身盡痛。乃却亂反正之君。主防風治一身盡痛。乃卒伍卑賤之職。隨所引而至。噫。神農列于上品之君。藥後人改爲卑賤之卒伍。何防風之不幸也。夫君令傳行。亦隨郵使所引。徧及萬方。若以隨所引至爲卑賤。則羌活亦可爲卒伍矣。如此議論。雖不大有關係。但使後人從而和之。則陋習終不可挽回矣。

雞子金銀花王不留行

天地之形如鳥卵。仲景卽以雞子白補氣。卵黃治血。

脉金銀花。花開黃白。藤名忍冬。得水陰之氣而蔓延。陶隱君謂能行榮衛陰陽。主治寒熱腹脹。敗毒消腫。蓋榮衛行而寒熱腫脹自消。得陰氣而熱毒自解。故又治熱毒下痢。飛尸鬼疰。喉痺乳蛾。王不留行亦花開黃白。故名金盞銀臺。其性善行。言雖有王命不能畱其行也。陶隱君亦取其能行氣血。主治金瘡癰腫。痛痺產難。下乳汁。利小便。出竹木刺。夫血氣畱阻百病皆生。榮衛運行精神自倍。故二種皆爲上品。並主輕身耐老。益壽延年。雞卵用形。二花取色。一因其延蔓。一取其善行。夫醫者意也。本草大義亦以意逆之。

則得矣。開之曰人但知金銀花敗毒消腫不知有行榮衛血氣之功得冬令寒水之氣。

### 沙參人參黃芪

沙參人參黃芪皆神農本經上品咸主補養元氣沙參色白氣味甘苦微寒主補中益肺氣肺氣者胃府所生之宗氣上出于肺以司呼吸人一呼則八萬四千毛竅皆闔一吸則八萬四千毛竅皆開故肺主皮毛補中者宗氣生于胃府也人參色白微黃氣味甘溫資胃府之精氣者也故主補五藏安精神定魂魄止驚悸除邪氣明目開心益志益五藏之精氣神志。

胃府之所生也。黃芪色黃氣味甘溫補益脾氣者也。

脾氣者元真之氣也。

元真者先天之真元生于地水之中

三焦通會元

真于肌腠故脾主肌肉黃芪主癰疽久敗排膿止痛。

大風癰疾五痔鼠癰補虛小兒百病蓋血氣留滯于

肌肉則爲癰腫肌腠之氣運行則肌肉生而膿腫消

矣。大風癰疾乃風邪傷榮而熱出于肘肉其氣不清

故使其鼻柱壞而色敗皮膚瘍潰經云腸辟爲痔蓋

脾氣孤弱五液注下則生痔漏鼠癰者邪氣留于脉

中而爲癰留于肉腠則爲馬刀俠癰蓋脾土盛而元

氣行則癰癭諸病皆解矣。補虛者補肌肉羸癯也。主



小兒百病者。小兒五藏柔脆。中土之氣未足。若過于飲食。則脾氣傷而不能運化矣。脾弱則胃強矣。胃強則消穀善飢。脾弱則肌肉消瘦。胃熱則津液不生。而熱疳食疳之病生焉。是以黃芪白朮黃連枳實爲小兒之要藥。蓋清其胃熱。脾氣運行。則無五疳五癆之病矣。腠理固密。則無急慢驚風之證矣。三者皆補中之品。而各有所主之分。按本草千種有奇。愚所論者。錯綜辯証。百不及一。同志高明。引伸觸類。一可貫十。十可櫟百。至參閱前人議論。是則曰是。非則曰非。闢先聖之奧義。以開來學。是予所深望焉。

薑附辯

乾薑甘草人參白朮黃芪補中氣之品也。是以吐傷中氣者。用理中圓。乃人參甘草乾薑白朮四味。附子乃助下焦之生氣者也。是以手足厥冷。脉微欲絕者。用四逆湯。乃附子乾薑甘草三味。夫啟下焦之生氣者。宜生附。補下焦之元氣。或汗漏不止。而陽欲外脫者。宜熟附以固補之。蓋元氣發原于下。從中焦而達于四肢。故生氣欲絕于下者。用下焦之附子。必配中焦之甘草。乾薑。或加入人參白朮。若止傷中氣而下焦之生原不傷者。止用理中。而不必附子矣。不格物性。

中下之分不體先聖立方之意有以生附配乾薑補  
中有發附子得生薑則能發散之說者有以附子無  
乾薑不熱得甘草則性緩之說者蓋以薑附爲同類  
疑惑後人誤事匪細如生氣欲絕于下所當急溫者  
若不用附而以薑試之則不救矣○元如曰不敢用  
附而先以桂代之者亦誤事不淺

### 炮製辯

上古以司歲備物謂得天地之專精如君相二火司  
歲則收取薑桂附子之熱類如太陽寒水司歲則收  
取苓連太黃之寒類如太陰土氣司歲則收取菟朮

參苓山藥黃精之土類如厥陰風木司歲則收取羌活防風天麻獨活之風類如陽明燥金司歲則收取蒼朮桑皮半夏之燥類蓋得主歲之氣以助之則物之功力倍厚中古之世不能司歲備物故用炮製以代天地之氣如製附子曰炮製蒼朮桑皮曰炒蓋以火助熱以炒助燥也製白朮以土拌製黃連以水浸皆所以助之也近有製附子以水煮曰陰製用芝麻炒蒼朮以蜜拌桑皮曰潤燥以薑酒炒芩連按傷寒方芩連以半夏作麴餅此皆由狐疑而無力量故也俱生用金匱諸昔齊相徐之才論藥有宣通補洩輕重滑瀉燥濕之

十劑元人王安道補出寒熱二種是宜用寒者專取其寒用熱者專取其熱宜瀉者專取其燥宜洩者專取其滑若反制其性而用之何異束縛手足而使之戰鬪哉

### 畏惡反辯

藥之相須相使相惡相反出北齊徐之才藥對非上古之論也。聿考傷寒金匱千金諸方相畏相反者多並用。有云相畏者如將之畏帥勇往直前不敢退却相反者彼此相忌能各立其功圓機之士又何必膠執于時襲之固陋乎

奇偶分兩辯

至真要論曰。近者奇之。遠者偶之。汗者不以奇。下者不以偶。夫近奇遠偶者。謂奇上而偶下。猶天地之定位也。下宜奇而汗宜偶者。以降者謂天升者謂地。地氣升而後能爲雲爲雨也。夫天地陰陽之道。天氣下降。氣流于地。地氣上升。氣騰于天。不則天地四塞而汗從何來。有不明天地氣交之道者。泥于近奇遠偶之句。反改爲汗不以偶。下不以奇。此不通之甚也。大要曰。君一臣二。奇之制也。君二臣四。偶之制也。君二臣三。奇之制也。君二臣六。偶之制也。近而奇偶。制小。

其服遠而奇偶制大其服大則數少小則數多多則九之少則二之蓋數少而分兩重者爲大方數多而分兩少者爲小方是以上古之方少者一二三味其分兩各三兩四兩多者不過八九味分兩亦各有兩數

古之二兩今之一兩也

皆有君臣佐使之分焉有獨贊東垣

能用大方如韓信將兵多多益善噫此但知有東垣而不知有內經者也夫東垣之大方不過以數方合用是爲複方如清暑益氣湯以補中益氣湯內加二妙生脉二方焉能如先聖之大方乎

上古大方間或用之試觀

鱉甲煎丸用至二十四味其間參伍錯綜如孔明陣

圖人莫能識

寒熱補瀉兼用辯

夫治病有專宜于寒者。熱者補者。瀉者。又宜寒熱補瀉之兼用者。如傷寒有附子瀉心湯。用大黃芩連附子。寒熱之並用者。有柴胡加龍骨牡蠣湯。以人參大黃黃芩薑桂補瀉寒熱之並用者。金匱有大黃附子細辛湯。有大黃乾薑巴豆之備急丸。此皆先聖賢切中肯綮之妙用。當參究其所用之因而取法之。今時有用涼藥而恐其太涼。用熱藥而恐其太熱。是止知藥之寒熱而不知病之邪正虛實也。然亦有並用寒



熱補瀉而切當者。反爲不在道者笑之。○開之曰寒熱補瀉兼用在邪正虛實中求之。則得矣。

### 官料藥辯

所謂官料藥者。乃解京納局之高品。近時有謂火瘰黃疸腫脹諸證。不宜服官料藥者。真齊東野人之語也。夫官料亦多係草根木皮。又何分草藥之非官料。而官料之非草藥乎。夫草藥自神農至今。計六百一十餘種。又雜草九種。有名未用者一百五十三種。內多有名而不識其草者。有草而不知其名者。若按圖經以對草之形。以草之主治何病以對經。未嘗不可。

若憑荷擔之野人。在彼亦不能識。而胡亂以命名。卽欲按經索草。彼亦胡亂付之。在所取之人。亦不知其是與非也。是烏可嘗試哉。

### 金匱腎氣丸論

腎氣丸乃上古之聖方。藏之金匱。故名金匱方。夫人秉先天之陰陽水火而生。水火土金之五行。此方滋補先天之精。系而交通于五臟。故名腎氣丸。用熟地黃八兩。以滋天乙之精。八者。男子所得之陰數也。用附子一枚。重一兩者。以資地二之火。兩爲陰數之終。一乃生陽之始。助陰中所生之陽。蓋兩腎之水火互。

交陰陽相合是以用地黃附子以助先天之水。火精  
炁者也。用桂通腎氣以生肝。桂色赤而爲百木之長  
肝主血而屬木也。古方原用桂枝用牡丹皮通腎氣上交于  
心。脾丹屬火而主血。牡乃陰中之陽升也。夫腎與肺  
皆積水也。澤瀉能行水上。復能瀉水下。行主通水。天  
之一炁是以配肉桂。丹皮澤瀉者導腎臟之水火。上  
交于四臟者也。茯苓歸伏心氣以下交。山藥培養脾  
土以化水。山茱萸乃木末之實。味酸色赤。復能導肝  
氣交通于腎。是以配茯苓。山藥。山茱萸澤瀉者導四臟  
之氣而下交于腎也。心肺爲陽。故用三兩之奇。肝脾

爲陰。故用四兩之偶。此培養精神氣血。交通五藏。五行之神方。不可缺一者也。宋錢仲陽以爲陽常有餘。陰常不足。去桂附而改爲六味地黃丸。夫精血固宜補養。而神炁可不資生乎。後人因而有加知母黃柏者。有加枸杞菊花者。有加麥冬五味者。竟失本來面目矣。夫加減之法。因陰虛火盛之人。以之治病則可。若欲調攝陰陽。存養精氣。和平水火。交通五行。益壽延年。神仙不老。必須恒服此金丹矣。○元如曰。精生于五藏而下藏于腎。腎氣上升以化生此精。是以五藏交通而後精氣充足。

## 枳朮湯論

金匱要畧用枳朮湯治水飲所作。心下堅大如盤。蓋胃爲陽。脾爲陰。陽常有餘。而陰常不足。胃強脾弱。則陽與陰絕矣。脾不能爲胃行其津液。則水飲作矣。故用朮以補脾。用枳以抑胃。後人不知胃強脾弱。用分理之法。咸謂一補一消之方。再按局方之四物湯。二陳湯。四君子湯。易老之枳朮丸。皆從金匱方套出。能明乎先聖立方大義。後人之方不足法矣。

## 膠艾湯論

艾名冰臺。削冰令圓。以艾向日取火。是能破兩腎水。

火之氣上交于心肺者也。

故曰陷下則灸之。

阿膠用阿井水

煎驢皮而成。阿水乃濟水伏行地中千里來源。其性趨下。夫心合濟水。肺主皮毛。阿膠能降心肺之氣以下交于兩腎者也。水火交而地天泰。則血氣流行。陰陽和合。又何病之有。明乎陰陽升降之道。五行生化之理。立方大意思過半矣。鐵甕申先生之交感丸亦從此中化出。

戊癸合化論

順治辛卯歲。予年四十有二。八月中。生一胃脘癰。在鳩尾斜下右寸許。微腫不紅。按之不痛。隱然如一

雞卵在內。姚繼元先生視之曰。此胃脘癰也。一名捧  
心癰。速宜解散。不則有性命之憂。與一大膏藥上加  
末藥二三錢。午間烘貼。至暮手足蘇軟。漸至身不能  
轉側。仰臥于書齋。心煩意亂。屏其家人。至初更時。癰  
上起一毒氣。從左乳下至肋下。脇入于左腎。入時如  
燒錐刺入。眼中一陣火光。大如車輪。神氣昏暈。痛楚  
難言。火光漸搖漾而散。神昏始蘇。過半時許。其氣復  
起。其行如舊。痛楚如前。如此者三四次。予思之。此戊  
與癸合也。然腑邪入藏。自分必死。妄想此毒氣不從  
脇下入腎。得從中而入于腸胃。則生矣。如此靜而行。

之初次不從。二次卽隨想而仍從左乳下入于腸中。腹中大鳴。無從前之痛楚矣。隨起隨想。因悟修養之道。氣隨想而運用者也。運氣法大能起鼓膈之證。勞怯欬嗽亦妙。至天明大泄數次。胸膈寬疎。繼元先生復視之曰。毒已解散。無妨事矣。予因問曰。膏藥乃毒藥耶。曰。非也。上撒之末藥名曰端午藥。純用砒霜巴豆。于端午日配制。無此毒藥焉能透入皮肉之內。予曰。何不早言。昨晚以爲必死于毒。今早始悟膏藥中必有毒藥而得生于毒矣。毒藥攻疾有如此之妙也。至次年中秋復發。仍用膏藥末藥。毫無前番之狀。而腫亦不消。予因想運



氣之妙。經行坐臥。以手按摩。意想此毒氣。仍歸腸胃。而出。如此十餘日而散。至次年中秋。又發。予對繼元先生曰。去歲膏藥不應。今須另法治之。姚曰。部院劉公之夫人。生此毒。曾另置末藥。比前藥更毒。貼之要起大泡。此藥用去。無有不應。貼上數日。並不起泡。腫亦不消。予想此證。已頑。不受毒藥之制。膏藥尚且不應。而況平和湯之治久病乎。卽揭去膏藥。用大艾圓。迎頭灸九壯。其毒隨火氣四散。嗣後永不發矣。予想陽明之毒。準在中秋金旺之時。而發。初從毒攻而解。次隨氣運而散。後因勝制而消。因悟氣運制化之道。有如此之妙。用五行

合化之理。人與天地相參。卽以此理推治百病。奇妙異常。王紹隆先生曰。業醫人須病病經過始得之矣。

太陰陽明論

三陰三陽者。天之六氣也。五藏六府者。有形之五行也。胃屬土而陽明主秋令之燥。陽明者。胃之悍氣。別走陽明。猶膀胱乃津液之府。而太陽之氣爲巨陽。五行六氣之有別也。夫兩陽合明。故曰陽明。陽盛之氣也。故胃土之氣柔和。土主柔順而陽明之氣燥熱。是以陽明得中。見少陰之濕化。則陰陽相和矣。胃土得戊癸之合。則火土之氣盛矣。故陽明之氣宜于和柔。胃土

之氣宜于強盛如火土之氣弱而又秉太陰之濕則水穀不消而爲虛泄矣此宜人參橘皮甘草半夏之類以助胃白朮蒼朮厚朴茯苓薑棗之類以益脾甚者加附子以助癸中之火若陽明悍熱之氣盛而不得太陰之化則陽與陰絕漸能食而瘦矣此又宜黃連枳實之類以抑胃芩朮薑棗之類以扶脾易老東垣以枳朮丸爲半補半消之法皆不得五行六氣之理先聖立方之意

### 虬蟲

余于南軒臨窗註書十有餘歲矣自晨至暮未嘗離

此窗前堦砌雖小而甚清潔每于夏月大風雨後卽有蜣蚰如母指大者蝸牛如田螺者生長極易此感天地之風濕而生所謂四生中之濕生也人秉天地之五行六氣而生身中亦具此六氣如傷寒病在厥陰感厥陰之風氣而虻生于中土蓋亦因風濕所生一時卽能長大亦如蚰蝸之易生易大者也又常聞人之藏府與猪相似余因見剖猪處稍住足觀之偶見一猪小腸內有虻蟲長尺許盤旋于內與人之虻蟲無異要知人病虻厥作痛或常吐虻便虻多因脾胃濕熱而生無病之人未常有虻也俗人相沿云胃

中有虢故能消食謬矣

聞之耆老自順治至康熙之初四十年間外  
郡人稱武林爲醫藪蓋其時盧君晉公以禪  
理參證醫理治奇疾輒效名動一時張君隱  
菴繼之而起名與相埒構侶山堂招同學友  
生及諸門弟子講論其中參考經論之同異  
而辨其是非于是談軒岐之學者咸向往于  
兩君之門稱極盛焉兩君所著書皆堪傳世  
張氏所輯者俱已授梓行世甫及百年流傳  
日少其針灸秘傳及侶山堂類辨二種已難

得購余尋之有年始得類辨一種觀其準古  
衡今析疑糾謬足爲後學規矩準繩亟爲重  
梓以廣其傳後之學者苟以此爲指南庶能  
得正道而由之寧有岐路之迷邪徑之誤哉  
隱菴初爲糧道書吏糧道患癰閉諸醫用藥  
皆罔效或薦隱菴隱菴以補中益氣湯投之  
一劑而愈或問之曰人治以降利之藥而不  
效子易以升提之藥而效其理安在隱菴曰  
公不見夫水注子乎閉其上而倒懸之點滴  
不能下也去其上之閉而水自通流非其法

耶今閱編中所釋將欲下之必先舉之而引  
輓轡之繩以喻正是此理人能以此法觸類  
而通之醫法固無盡藏哉茲事余蓋聞之黃  
君觀石者如是近又聞張君東扶言盧晉公  
事糧道患內閉溺不得下勢甚亟諸醫皆束  
手晉公先生以人參麻黃各一兩定劑諸醫  
囁嚅不敢謂是糧道不疑而飲其藥不踰時  
溺下糧道喜以千金贈晉公與予前所聞者  
異辭予意盧張二君所治各一當事而傳者  
均屬之糧道致有異同之疑耳黃張二友皆

非妄言者故並紀之以爲治癰閉之法并以證此帙中名言精理所蘊不少人當殫思細參以收其益慎毋視爲淺近而忽之也

乾隆己丑三月五日戊子胥山老人王琦跋  
憶甲子歲暮以事往來橫山大嶺間道中憇一農家農家方解豕析其前蹄有清水流出約二升許異而詢之農家子曰此豕自么時卽患足弱不能行立恒臥而食此其病之所由來也予因是悟人之病手足不良而不任持行者蓋因水濕之氣留滯其中者亦如此



矣茲閱隱菴所記因豬腸之虬而知無病之  
人未嘗有虬其事固可類觀也穀雨後三日  
庚子校勘已畢重閱此條因泚筆附記于後